




ROGHA NA hEORPA

**TREOIRLÍNTE POLAITIÚLA
DON CHÉAD CHOIMISIÚN EORPACH EILE
2024–2029**

Ursula von der Leyen

Iarrthóir ar Uachtaránacht an Choimisiúin Eorpaigh



Strasbourg
18 Iúil 2024




ROGHA NA hEORPA

TREOIRLÍNTE POLAITIÚLA
DON CHÉAD CHOIMISIÚN EORPACH EILE
2024–2029

Ursula von der Leyen

Iarrthóir ar Uachtaránacht an Choimisiúin Eorpaigh





ROGHA NA hEORPA

Ba mheabhrúchán é an fheachtasaíocht ar fud na hEorpa roimh thoghcháin Eorpacha na bliana seo ar a bhfuil i gceist leis an Aontas seo againne. Beagnach 500 milliún duine a bhfuil cultúir éagsúla, stair chasta agus dearcthaí éagsúla acu, ag teacht le chéile ag an am céanna chun a chur in iúl gur mian leo Aontas iomlán 27 dtír a bheith ann. Agus a vóta á chaitheamh acu cabhraíonn siad freisin le cur le féiniúlacht choiteann Eorpach – é seo go léir ceangailte le chéile ag ár dtaipéis chultúrtha shaibhir agus éagsúil. Seo é an neart is mó atá ag an Eoraip. **Déanann sé den Eoraip rud atá níos mó ná tógáil nó tionscadal. Is í an Eoraip an baile seo againne:** uathúil sa dearadh agus aontaithe san éagsúlacht.

Ó na vótálaithe céaduaire, an líon is mó a bhí ann riamh, go dtí na daoine sin a bhfuil vóta caite acu i ngach toghchán Eorpach, léirigh daoine dóchas agus mianta le haghaidh todhchaí níos sláintiúla agus níos rathúla. Ach léirigh siad freisin go bhfuilimid ag maireachtáil ré na himní agus na héiginnteachta. Tá an-amhras agus an-imní ar mhuintir na hEorpa faoi na héagobhsaíochtaí agus na héiginnteachtaí atá romhainn – ón gcostas maireachtála, tithíochta agus gnó a dhéanamh go dtí an chaoi a láimhseáiltear saincheistanna ar nós na himirce. Ónár slándáil sa bhaile go dtí na cogáil san Úcráin agus sa Mheánoirthear. Is cúis imní dóibh freisin gur minic nach mbíonn an Eoraip tapa go leor; go bhféadfadh sé a bheith róchoimhthíoch nó róthrom.

Tá na hionchais agus na hábhair imní sin go léir fíor, tá údar leo agus ní mór freagairt dóibh. Chuige sin, **creidim go bhfuil sé ríthábhachtach go seasann an croílár daonlathach san Eoraip.** Ach má tá an croílár sin chun fanacht slán caithfidh sé a léiriú go bhfuil sé in ann dul i ngleic leis na hábhair imní agus na dúshláin a bhfuil daoine ag tabhairt aghaidh orthu ina saol. Mura ndéanfaí é sin, spreagfaí doicheall agus polarú a d'fhágfadh talamh torthúil dóibh siúd a bhfuil réitigh shimplíocha á scaipeadh acu ach atá ag iarraidh ár sochaithe a dhíchobhsú i ndáiríre.

Is é seo comhthéacs na ré ina bhfuil athrú ollmhór ag tarlú – dár sochaí agus dár slándáil, dár bpláinéad agus dár ngeilleagar. Féadfaidh luas an athraithe a bheith

díchobhsaitheach agus, tá roinnt daoine ann a bhraitheann uathu an domhan mar a bhíodh agus a mbíonn imní orthu faoin domhan mar a bheidh.

Leis an méid sin ar fad – in éineacht le drochiarmaí na dtoghchán agus na n-imeachtaí i ndomhan atá níos conspóidí – cruthaíodh tréimhse shuaite don Eoraip, tréimhse a d’fhéadfadh a bheith seismeach. Tá rioscaí ann, tá na freagrachtaí tromchúiseach.

Tá rogha shoiléir os comhair na hEorpa anois.

An rogha chun aghaidh a thabhairt ar an domhan éiginnte timpeall orainn inár n-aonar. Nó chun ár sochaithe a aontú agus a bheith aontaithe bunaithe ar ár luachanna.

An rogha le bheith spleách agus ligean do na deighiltí muid a lagú. Nó a bheith misniúil inár n-uaillmhian agus ceannasach inár ngníomhaíocht, ag obair i gcomhar lenár gcomhpháirtithe ar fud an domhain.

An rogha chun neamhaird a dhéanamh ar réadúlachtaí nua nó ar luas an athraithe. Nó a bheith soiléir faoin domhan agus na bagairtí timpeall orainn mar atá siad i ndáiríre.


An rogha chun ligean do na hantóiscigh agus lucht an ghéillte a bheith i réim. Nó a chinntiú go leanfaidh ár bhfórsaí daonlathacha de bheith láidir.

Is é mo thuairim maidir leis na dúshláin is mó dár linne – ón tslándáil, go dtí an t-athrú aeráide go dtí an t-iomaíocht – nach féidir iad a réiteach ach amháin trí ghníomhaíocht chomhpháirteach. **Na bagairtí atá orainn, tá siad rómhór chun dul i ngleic leo inár n-aonar. Na deiseanna atá romhainn, tá siad rómhór le tapú inár n-aonar.**

Sa chomhthéacs sin, creidim nach mór don Eoraip an rogha is fearr atá aici a roghnú: An tAontas.

Tá sé seo bunaithe ar an gcreideamh láidir atá agam gurb í an Eoraip amháin atá in ann aghaidh a thabhairt ar na dúshláin atá romhainn ó ghlúin go glúin sa domhan éagobhsaí seo – tacú leis an Úcráin a fhad is gá, ár bpláinéad a chosaint, an daonlathas a chosaint, tacú le slite beatha, le tionscail agus le feirmeoirí, nó na forbairtí teicneolaíochta a chur chun cinn a mhúnlóidh an domhan an chuid eile den chéad seo.

Le 5 bliana anuas, léirigh an Eoraip a bhfuil sí in ann a bhaint amach nuair a oibrítear as lámh a chéile. Nuair a bhíonn sí tapa agus nuair a úsáideann sí a méid agus a cumhacht – mar a rinneamar chun cinnte a dhéanamh de go bhfuair gach Ballstát vacsaíní ag an am céanna. Nuair a bhíonn sí misniúil agus uaillmhianach –



mar a bhíomar maidir leis an aistriú glas agus an t-aistriú digiteach agus maidir lenár bplean téarnaimh, NextGenerationEU. Nuair a bhíonn sí aontaithe – mar a bhíomar agus muid ag tacú leis an Úcráin, leis an tsaoirse agus leis an daonlathas le linn na tréimhse is dorchá agus is deacra.

Is mithid don Eoraip an fód a sheasamh le chéile arís.

Is freagracht chomhroinnte í seo ar vótálaithe uile na hEorpa ach freisin orthu siúd uile a bhfuil bratach na hEorpa ar foluain acu ó Chív, go Císineá, Tbilisi agus ar fud na mBalcán Thiar – chomh maith leo siúd atá ag iarraidh todhchaí Eorpach ar shráideanna na mbailte agus na gcathracha ar fud an Aontais agus na mór-roinne seo againne. Ní mór dúinn ullmhú don todhchaí sin – trí thacú leis na hiarrthóirí uile ina n-aistear chuig an Aontas seo againne, aistear atá bunaithe ar fhiúntas, agus an tAontas seo againne a ullmhú don todhchaí trí athchóirithe riachtanacha a dhéanamh.


Ní féidir ceist dhénártha a dhéanamh den Aontas a roghnaíonn muid, leis an rogha idir ‘níos mó’ agus ‘níos lú’ den Eoraip. Ar na saolta seo, **tá gá againn le hAontas atá níos tapa, níos simplí, níos dírithe agus níos aontaithe, a thacóidh níos mó le daoine agus le cuideachtaí.** Tá gá againn le hAontas a ghníomhaíonn i gcás ina bhfuil breisluach ag baint leis agus ina slógaimid go léir le chéile le sprioc shoiléir agus misean comhchoiteann – institiúidí an Aontais, rialtais náisiúnta agus réigiúnacha, an earnáil phríobháideach, comhpháirtithe sóisialta, saoránaigh agus an tsochaí shibhialta.

D’éirigh linn go leor a bhaint amach le chéile le 5 bliana anuas, ón gComhaontú Glas don Eoraip go NextGenerationEU, ón gComhshocrú maidir le hImirce agus Tearmann go cur i bhfeidhm Chólún Eorpach na gCeart Sóisialta. **Caithfidh an cúrsa a choinneáil maidir lenár spriocanna uile, ina measc sin na spriocanna atá leagtha amach againn sa Chomhaontú Glas don Eoraip, agus sin é atáimid ag dul a dhéanamh.**

Ní mór dúinn díriú anois ar an méid a chomhaontaíomar a chur i bhfeidhm, ag obair go dlúth leis na páirtithe leasmhara go léir, agus ag díriú ar na dúshláin mhóra atá romhainn. Sin an fáth ar mian liom sraith cuspóirí spriocdhírithe agus comhchoiteanna a shainiú do 2030 agus ina dhiaidh sin, le spriocanna agus torthaí soiléire sna réimsí tosaíochta seo.

Cosaint agus slándáil. Rathúnas inbhuanaithe agus iomaíochas. Daonlathas agus cothroime shóisialta. Ceannaireacht ar fud an domhain agus beart a dhéanamh de réir briathair san Eoraip.

Is é atá sna Treoirínte Polaitiúla an plean atá againn le haghaidh neart agus aontacht na hEorpa. Baineann na tosaíochtaí a leagtar amach anseo leas as na



comhairliúcháin a rinne mé agus as na smaointe coiteanna a pléadh leis na fórsaí daonlathacha i bParlaimint na hEorpa, agus as Clár Oibre Straitéiseach na Comhairle Eorpaí do 2024-2029. Ní clár oibre uileghabhálach atá sna Treoirlínte, ach is é is aidhm dóibh an obair choiteann atá le déanamh againn a stiúradh.

Sna cúig bliana amach romhainn, saineofar áit na hEorpa sa domhan don chaoga bliain atá amach romhainn. Cinnfidh na Treoirlínte seo an gcruthóimid ár dtodhchaí féin – nó an ligfimid di a bheith múnlaíthe ag imeachtaí nó ag daoine eile.

I saol an aimhleasa agus na héiginnteachta, creidim go gcaithfidh an Eoraip an rogha a dhéanamh cloí le chéile agus an misneach a bheith aici le bheith uaillmhianach agus le héachtaí a dhéanamh. Beart a dhéanamh de réir ár mbriathair don am i láthair, mar a rinneamar riamh, agus Aontas níos láidre a ullmhú don todhchaí.

Sin é ceann feadhna na dTreoirlínte seo agus a bhfuilim ag iarraidh oibriú air le Parlaimint na hEorpa agus leis na Ballstáit sna 5 bliana amach romhainn.

Plean nua chun go mbeidh rathúnas agus iomaíochas na hEorpa inbhuanaithe

Riamh anall, ba mhór-roinn tionsclaíochta, fiontraíochta agus nuálaíochta í an Eoraip, ós dual di í féin a athchruthú trí réabhlóidí tionsclaíocha agus teicneolaíochta, trí iomaíocht dhomhanda, agus de bharr mar a bhíonn athrú ag teacht ar an tsochaí féin.

Is ón ngeilleagar atá ag an Eoraip a eascraíonn an bua sin cuid mhaith, toisc gur geilleagar sóisialta margaidh uathúil é a fhágann go bhfuil an lámh in uachtar ag an Eoraip ar a cuid iomaitheoirí ar bhealaí go leor.

Ach tá an iomarca baic struchtúracha ar ár n-iomaíochas go fóill. An domhan ina bhfeidhmíonn ár gcuid cuideachtaí, is suaite an domhan é, is mó an iomaíocht éagórach atá ann ná mar a bhíodh, is airde na praghsanna fuinnimh atá ann ná mar a bhíodh, tá sé buailte ag ganntanais scileanna agus saothair, agus tugann sé dúshlán na gcuideachtaí sin ó thaobh rochtain a fháil ar an gcaipiteal a bhíonn de dhíth orthu.

Nach againne atá a fhios cé na contúirtí a bhaineann le spleáchais agus le slabhraí soláthair a bheith á roiseadh, agus a leithéid feicthe againn i gcás na dtáirgí leighis aimsir na paidéime, sin agus an tráth a raibh dúmhál fuinnimh á dhéanamh orainn ag Putin, agus mar gheall ar an monaplacht atá ag an tSín ar amhábhair riachtanacha le haghaidh ceallraí agus sliseanna.

Is geall le rás an saol atá inniu ann, agus gach dream ar a mbionda ag iarraidh gurb iadsan an dream is túisce a bhainfidh an aeráidneodracht amach agus a fhorbróidh na teicneolaíochtaí a mhúnlóidh an geilleagar domhanda go ceann blianta fada.

Ba rómhór an mhairg don Eoraip titim chun deiridh sa rás sin agus an buntáiste iomaíoch

atá aici a chailleadh, sin nó aon leochaileacht straitéiseacha a fhágáil gan chosaint.

Is láidir an bhunchloch atá leagtha síos againn, a bhuí leis an infheistíocht ollmhór atá déanta sa teicneolaíocht ghlan dhigiteach trí NextGenerationEU, agus leis an gcur chuige maidir leis an gceannasacht a chomhaontaigh ceannairí in Versailles.

Is iomaí acmhainn atá againn a thugann buntáiste iomaíoch dúinn – orthu sin tá idir thaighdeoirí agus ollscoileanna den chéad scoth, ghnólachtaí beaga rathúla, agus timpeallacht chobhsaí atá bunaithe ar an smacht reachta agus ar an gcothrom iomaíochta.

Mar sin féin, de bharr dúshlán agus deiseanna chomh mór sin a bheith ann, caithfidh anois dul i bhfad níos tapúla agus i bhfad níos faide chun iomaíochas, rathúnas agus cothrom na Féinne a chinntiú. Bainfidh mé leas freisin as an tuarascáil atá le teacht ó Mario Draghi maidir le hiomaíochas le haghaidh na hoibre sin.

Tá Plean Rathúnais Eorpach nua de dhíth orainn ar mhaithe le:

- *Cúrsaí gnó a éascú agus an Margadh Aonair a dhoimhniú;*
- *Comhaontú maidir le Tionsclaíocht Ghlan a fhorbairt chun dícharbónú a dhéanamh agus chun praghsanna fuinnimh a laghdú;*
- *Taighde agus nuálaíocht a chur i gcroílár ár ngeilleagair;*
- *Dlús a chur leis an táirgiúlacht a bhuí le leathadh na teicneolaíochta digití;*
- *Infheistíocht ollmhór a dhéanamh inár n-iomaíochas sa chaoi go mbeidh sé inbhuanaithe;*
- *Dul i ngleic leis an mbearna scileanna agus leis an ganntanas lucht saothair.*

Cúrsaí gnó a éascú

Tá Margadh Aonair na hEorpa rithabhachtach ar mhaithe lenár n-iomaíochas. Fágann sé gur féidir le hearraí, seirbhísí, airgead agus daoine gluaiseacht faoi shaoirse, rud a osclaíonn margaí agus a dhéanann an saol níos éasca do dhaoine, do chuideachtaí agus d'infheisteoirí.

Ach d'fhéadfadh sé i bhfad níos mó a dhéanamh. Caithfear **gaoth a chur sna seolta arís chun go ndéanfar an Margadh Aonair** a iomlánú in earnálacha éagsúla, na cinn seo a leanas cuir i gcás – earnáil na seirbhísí, earnáil an fhuinnimh, earnáil na cosanta, earnáil an airgeadais, earnáil na cumarsáide leictreonaí agus an earnáil dhigiteach. Cuirfidh sé sin ar a gcumas dár

gcuideachtaí – go háirithe dár bhfiontair bheaga agus mheánmhéide (FBManna) – uas-scálú agus barr tairbhe a bhaint as an margadh.

Creidim go bhfuil **cur chuige nua i leith an bheartais iomaíochta** de dhíth orainn, cur chuige a d'oirfeadh ar dhóigh ní b'fhearr dár gcuid spriocanna coiteanna, arbh fhearr an tacaíocht a thabharfadh sé do chuideachtaí agus iad ag uas-scálú i margaí domhanda, agus a chinnteodh i gcónaí go mbeidh cothrom iomaíochta ann. Ba cheart an bealach a ndéanaimid measúnú ar chumaisc a bheith ag teacht leis an méid sin, sa tslí go gcuirfí an nuálaíocht agus an athléimneacht san áireamh go hiomlán.

Cinnteoimid go gcoinneofar an beartas iomaíochta cab ar chab leis na hathruithe is déanaí a thiocfaidh ar mhargaí domhanda, agus go bhfágfaidh sé nach n-ardófaí praghsanna ar thomhaltóirí, ná nach n-ísleofaí caighdeán earraí ná seirbhísí orthu, mar gheall ar dhlús an mhargaidh.

Na 24 mhilliún FBM atá san Eoraip, cruthaíonn siad poist ardcháilíochta atá fréamhaithe i bpobail áitiúla. Ina dhiaidh sin féin, tá siad féin agus na cuideachtaí móra thíos leis an iomarca castachta i gcónaí.

Ní mór dúinn cúrsaí gnó a dhéanamh níos éasca agus níos tapúla san Eoraip.

Féachfaidh mé chuige gur móorthosaíochtaí polaitiúla de chuid obair an Choimisiúin trí chéile a bheidh sa luas, sa chomhleanúnachas agus sa simpliú.

Cuirfear de chúram ar gach Coimisinéir díriú ar laghdú na n-ualaí riaracháin agus ar shimpliú an chur chun feidhme: is lú maorlathas agus tuairisciú a bheidh ann, is mó muinín a bheidh ann, beidh an forfheidhmiú níos fearr, agus beidh an ceadú níos tapúla.

Beidh idirphlé rialta maidir le cur chun feidhme acu le **páirtithe leasmhara** go bpléifidh siad cé mar is fearr is féidir an

cur chun feidhme a ailíniú le fiordhálaí an tsaoil.

Oibreoidh siad i gcomhar le Leas-Uachtarán um Chur Chun Feidhme, um Shimpliú agus um Chaidreamh Idirinstitiúideach chun **tástáil struis a dhéanamh ar *acquis* an Aontais ina iomláine.**

Ar an mbonn sin, déanfaimid tograí **le haghaidh reachtaíocht a shimpliú, a chomhdhlúthú agus a chódú**, ar mhaithe le deireadh a chur le haon fhorluí ná contrárthacht a bheadh ann, agus le hardchaighdeán a choinneáil i réim ag an am céanna.

Tabharfaimid aghaidh freisin ar an meascán mearaí de rialacháin náisiúnta a fhágann go bhfuil Ballstáit thar a chéile ann ina bhfuil sé casta gnó a dhéanamh. Fágfaimid gur fusa a bheidh sé feasta ag lucht nuálaíochta rath a bhaint amach, trí laghdú a dhéanamh ar an reicneáil a bhíonn le híoc acu nuair nach n-éiríonn leo.

Chun tacú leis sin, molfaidh mé stádas dlíthiúil uile-Aontais nua chun **cabhrú le cuideachtaí nuálacha fás**. Is éard a bheidh i gceist leis sin rud ar a dtabharfar an ‘28ú córas’, trína gcuirfear tacar rialacha simplithe, comhchuibhithe i bhfeidhm i réimsí áirithe ar mhaithe le cuideachtaí.

Ní mór dúinn freisin tacaíocht níos fearr a thabhairt do ghnólachtaí nach bhfuil inchurtha le corparáidí móra ó thaobh méid ná cumas maoinithe de. Is minic a imríonn cuideachtaí eachtracha ‘díoth-éadálacha’ orthu, ionas nach mbeadh orthu dul in iomaíocht leo lá níos faide anonn.

Tabharfaimid isteach **catagóir nua de ‘cuideachtaí meánchaipitlithe beaga’** agus déanfaimid measúnú féachaint an bhfuil an rialáil a chuirtear i bhfeidhm i leith cuideachtaí móra ródhian, an bhfuil sí díréireach, nó an gcuireann sí bac ar fhorbairt iomaíoch na gcuideachtaí sin.

Ní mór an reachtaíocht a bheidh ann amach anseo a shimpliú, agus gnólachtaí beaga agus meon na coimhdeachta a choinneáil i gcuimhne agus í á ceapadh. Déanfar é sin trí **sheiceáil nua maidir le FBManna agus le hiomaíochas** ionas nach mbeidh ualaí riaracháin ann thar an méid is gá agus go gcoinneofar ardchaighdeán ar bun.

Ach is obair mheithle í an reachtóireacht níos fearr – caithfidh na hinstitiúidí go léir lena mbaineann a bheith páirteach inti, agus an próiseas reachtach ó thús deireadh a bheith san áireamh, ón togra go dtí na leasuithe, agus ó na leasuithe go dtí an glacadh.

Agus an méid sin ar intinn agam, molfaidh mé **Comhaontú idirinstitiúideach maidir le simpliú agus le reachtóireacht níos fearr** a athnuachan ionas gur ar an mbealach céanna a dhéanfaidh gach institiúid measúnú ar thionchar agus ar chostas a cuid leasuithe.

Chun a chinntiú go ndéanfaimid obair leantach i dteannta a chéile maidir le **forfheidhmiú agus le cur chun feidhme**, iarrfaidh mé ar gach Coimisinéir tuarascáil bhliantúil ar dhul chun cinn a ullmhú don Choiste Parlaiminteach agus don fhoirmíocht den Chomhairle lena mbaineann siad.

Comhaontú maidir le Tionsclaíocht Ghlan

Dul chun cinn stairiúil is ea an uaillmhian aeráide atá leagtha síos againn, agus tá sé cruthaithe againn gur féidir linn ár gcuid astaíochtaí a laghdú agus ár ngeilleagar a fhás ag an am céanna.

Caithfimid an cúrsa a choinneáil maidir leis na spriocanna atá leagtha amach againn sa Chomhaontú Glas don Eoraip, agus sin é atáimid ag dul a dhéanamh.

Tá ag géarú go tapa ar an ngéarchéim aeráide. Caithfear an geilleagar a

dhícharbónú, agus ag an am céanna, caithfear é a thionsclú – agus is dhá rud iad sin atá lán chomh práinneach le chéile.

Caithfimid díriú ar an **gcreat dlíthiúil atá ann cheana le haghaidh 2030 a chur i bhfeidhm**, agus caithfear tabhairt faoi sin ar an mbealach is simplí, is cothroime agus is costéifeachtaí is féidir.

Tá Comhaontú nua maidir le Tionsclaíocht Ghlan de dhíth orainn do thionscail iomaíocha agus do phoist ardcháilíochta sna chéad 100 lá den sainordú.

Díreoidh go huile agus go hiomlán ar **thacú le cuideachtaí, agus ar na dálaí cearta a chruthú dóibh** chun go mbeidh siad in ann ár gcuid spriocanna coiteanna a bhaint amach. Is éard atá i gceist leis sin rudaí a shimpliú, a bheith ag infheistiú, agus a chinntiú go mbeidh rochtain ar sholáthairtí fuinnimh agus ar amhábhair shaora, inbhuanaithe agus shlána.

Réiteoidh sé sin an bealach i dtreo na **sprice go laghdófar astaíochtaí 90% faoi 2040**, sprioc a mholfaimid a chumhdach inár n**Dlí Aeráide Eorpach**. Ag gach céim, oibreoidh i gcomhar le lucht tionsclaíochta, le comhpháirtithe sóisialta agus leis na páirtithe leasmhara go léir.

Cuirfimid chun tosaigh **Gníomh um Bhrostú Dhícharbónú na Tionsclaíochta** chun tacú le tionscail agus le cuideachtaí agus iad i mbun an aistrithe.

Leis an ngníomh céanna cuirfear infheistíocht i dtreo infreastruchtúir agus i dtreo na tionsclaíochta, go mór mór i gcás earnálacha dianfhuinnimh. Tacófar le margáí ceannródaíocha Eorpacha i dtaobh teicneolaíocht ghlan a fhorbairt, a tháirgeadh, agus a leathadh i réimse na tionsclaíochta. Chomh maith leis sin, cabhrófar i dtaobh dlús a chur leis an bpleanáil, leis na tairiscintí agus leis an bpróiseas ceadúcháin a bhaineann leis an méid sin.

Ní mór dúinn billí fuinnimh na gcuideachtaí agus na dteaghlach a laghdú.

A bhuí le bearta Eorpacha, is le foinsí fuinnimh in-athnuaite a gineadh 50% den chumhacht leictreachais a gineadh san Aontas le bliain anuas – sin é an leibhéal is airde dá raibh ann riamh. Tá an spleáchas a bhíodh againn ar ghás iontaise na Rúise laghdaithe go mór, agus tá laghdú tagtha ar an tomhaltas foriomlán mar gheall ar choigilteas fuinnimh.

Mar sin féin, tá go leor dúshlán le sárú againn fós. Caithfidh an margadh fuinnimh seo againn fónamh níos fearr dúinn i dtaobh praghsanna a laghdú, agus trína chinntiú go mbaineann na tomhaltóirí féin tairbhe as na costais táirgthe níos ísle a bhaineann le fuinneamh glan.

Leanfaimid de bheith ag laghdú praghsanna fuinnimh trí dhruidim amach arís eile ó na breoslaí iontaise, trí sholáthar comhpháirteach breoslaí a threisiú, agus trí bheith ag forbairt an rialachais is gá le haghaidh **Aontas Fuinnimh** ceart.

Infheistíocht i mbonneagar agus i dteicneolaíochtaí an fhuinnimh ghlain, déanfaimid sin a mhéadú agus tabharfaimid tús áite di.

Áireofar leis sin foinsí in-athnuaite fuinnimh agus teicneolaíochtaí ísealcharbóin, bonneagar eangaí, acmhainneacht stórála agus bonneagar iompair le haghaidh CO₂ arna ghabháil. Déanfaimid infheistíocht freisin i mbearta éifeachtúlachta fuinnimh, i ndigitiú ár gcórais fuinnimh agus i gcur in úsáid gréasáin hidrigine.

Thairis sin, ní mór dúinn cumhacht agus méid ár margaidh a úsáid chun soláthairtí a dhaingniú. Sin an fáth a molfaidh mé ár **sásra um éileamh comhiomlán** a ghníomhachtú agus a leathnú chun dul níos faide ná gás agus hidrigin agus amhábhair chriticiúla a chuimsiú.

Oibreoimid ar **Chomhpháirtíochtaí nua um Thrádáil agus Infheistíocht Ghlan** chun soláthar amhábhbar, fuinnimh ghlain agus teicneolaíochta glaine a chinntiú ó gach cearn den domhan.

Trí dhea-shampla a thabhairt sa bhaile, **is mian liom go leanfadh an Eoraip de bheith ar thús cadhnaíochta sa chaibidlíocht idirnáisiúnta maidir leis an aeráid**, ag tógáil ar thionscnaimh de chuid an Aontais le déanaí maidir le saincheistanna domhanda, cuir i gcás meatán, praghsáil carbóin agus spriocanna domhanda le haghaidh foinsí in-athnuaite fuinnimh agus éifeachtúlacht fuinnimh.

Chuige sin, leagfaimid amach ár bhfís **dhomhanda don aeráid agus don fhuinneamh** roimh COP30 sa Bhrasail in 2025. Agus cuirfimid dlús lenár **dtaidhleoireacht ghlas** agus déanfaimid níos mó teagmhála le tíortha nach den Aontas iad maidir le gnéithe seachtracha ár mbeartas.

Chun ár gcuspóirí aeráide a bhaint amach, ní mór dúinn freisin é a dhéanamh níos éasca do dhaoine aistriú chuig roghanna níos inbhuanaithe. Is amhlaidh atá go háirithe i gcás na soghluaisteachta. Ach tá an taisteal traenach trasteorann fós ródheacair do go leor saoránach. Ba cheart go mbeadh daoine in ann córais áirithe oscailte a úsáid chun turais thras-Eorpacha a cheannach le roinnt soláthraithe, gan a gceart chun aisíocaíochta ná chun taisteal cúiteach a chailleadh.

Chuige sin, molfaimid an **Rialachán maidir le hÁirithint agus Ticéadú Aonair Digiteach**, chun a chinntiú gur féidir le muintir na hEorpa ticéad aonair amháin a cheannach ar aon ardán amháin agus cearta paisinéirí a fháil dá dturas iomlán.

Chun an aeráidneodracht a bhaint amach faoi 2050, beidh gá le raon leathan teicneolaíochtaí nuálacha, i réimsí ó shoghluaisteacht go fuinneamh. Mar shampla, tugann sprioc 2035 maidir le haeráidneodracht le haghaidh carranna

intuarthacht d'infheisteoirí agus do mhonaróirí. Chun sin a bhaint amach, beidh gá le cur chuige atá neodrach ó thaobh na teicneolaíochta de, ina mbeidh ról ag ríomhbhreislaí trí leasú spriocdhírthe a dhéanamh ar an rialachán mar chuid den athbhreithniú atá beartaithe.

Geilleagar níos ciorclaí agus níos athléimní

Beidh an obair chun ár ngeilleagar a dhícharbónú ina cuid dár n-aistriú leanúnach chuig patrún táirgthe agus tomhaltais níos inbhuanaithe – agus luach na n-acmhainní inár ngeilleagar á choinneáil go ceann tréimhse níos faide.

Sin é is cuspóir do **Ghníomh nua um an nGeilleagar Ciorclach**, lena gcuideofar le héileamh margaidh a chruthú d'ábhair thánaisteacha agus do mhargadh aonair le haghaidh dramhaíola, go háirithe maidir le hamhábhair chriticiúla.

Cuirfimid **pacáiste nua maidir le tionscal na gceimiceán** ar aghaidh, arb é is aidhm dó REACH a shimpliú agus soiléireacht a chur ar fáil maidir le 'buancheimiceán', nó PFASanna.

Ní mór dúinn ár ngeilleagar a dhéanamh níos athléimní agus níos neamhspleáiche.

Tá tábhacht ar leith ag baint leis sin in earnáil **na sláinte agus na cógaisíochta**. Bhí ar an Aontas dul i ngleic le ganntanas mór feistí leighis agus cógas leighis, agus tá sé ag éirí an-deacair antaibheathaigh, inslin, pianmhúcháin agus táirgí eile a fháil.

Chun an méid sin a leigheas, molfaimid **Gníomh um Chógais Chriticiúla** chun spleáchais a laghdú maidir le cógais leighis chriticiúla agus comhábhair chriticiúla, go háirithe i gcás táirgí nach bhfuil ach líon beag monaróirí nó tíortha soláthair díobh.

Beidh sé sin mar chuid dár gcuid oibre chun **Aontas Sláinte na hEorpa** a chur i gcrích le slabhraí soláthair éagsúlaithe, rochtain ar na cóireálacha is forbartha, córais sláinte níos athléimní agus fardail straitéiseacha de phríomhchógais leighis. Ní mór dúinn leanúint lenár gcuid oibre ar fhrithsheasmhacht in aghaidh ábhair fhrithmhicróbacha.

Cuirfimid dlús freisin lenár gcuid oibre ar **shláinte choisctheach**, go háirithe maidir leis an meabhairshláinte, ag an obair san áireamh, agus le galair chardashoithíocha – chomh maith le cóireálacha le haghaidh tinnis mheathlúcháin agus taighde ar uathachas. Cuirfidh sé sin le samhail rathúil an Phlean Sáraithe Ailse.

Ní mór dúinn níos mó a dhéanamh freisin chun slándáil ár gcóras sláinte a chosaint, córais ar a ndírítear cibirionsaithe agus ionsaithe bogearraí éirice níos minice anois. Chun feabhas a chur ar bhrath bagairtí, ullmhacht agus freagairt ar ghéarchéimeanna, molfaidh mé **plean gníomhaíochta Eorpach maidir le cibearshlándáil ospidéal agus soláthraithe cúraim sláinte** sna chéad 100 lá den sainordú.

Borradh a chur faoin táirgiúlacht trí scaipeadh na teicneolaíochta digití

Tá iomaíochas na hEorpa faoi bhrú mar gheall ar tháirgiúlacht níos ísle i gcomparáid le hiomaitheoirí díreacha domhanda. Gné lárnach de sin is ea scaipeadh neamhleor teicneolaíochtaí digiteacha, rud a imríonn tionchar ar ár gcumas an teicneolaíocht a úsáid chun seirbhísí agus samhlacha gnó nua a fhorbairt.

Tosóimid trí dhíriú ar chur i bhfeidhm agus ar fhorfheidhmiú na ndlíthe digiteacha a glacadh le linn an tsainordaithe dheireanaigh. Ní mór d'ollchuideachtaí teicneolaíochta freagracht a ghlacadh as a gcumhacht shistéamach ollmhór inár sochaí agus inár

ngilleagar. Tá tús curtha againn le forfheidhmiú gníomhach an Ghnímh um Sheirbhísí Digiteacha agus an Ghnímh um Margáí Digiteacha. **Cuirfimid dlús lenár bhforfheidhmiú agus déanfaimid é a ghéarú** le linn an tsainordaithe atá le teacht.

Tacóimid leis sin trí dhul i ngleic le dúshlán a bhaineann le **hardáin ríomhthrachtála** chun a chinntiú go mbainfidh tomhaltóirí agus gnólachtaí tairbhe as cothrom iomaíochta bunaithe ar rialuithe éifeachtacha custaim, cánach agus sábháilteachta agus ar chaighdeán inbhuanaitheachta.

Dá mbainfí amach ár spriocanna digiteacha – agus dá dtógfaí fiormhargadh aonair digiteach – dhéanfaí athrú ó bhonn ar ár dtáirgiúlacht agus ar ár n-iomaíochas.

Cuirfimid dlús lenár n-infheistíocht sa chéad rabharta eile de theicneolaíochtaí ar thús cadhnaíochta, go háirithe an tsár-ríomhaireacht, leathsheoltóirí, Idirlíon na Rudaí Nithiúla, an ghéanómaíocht, an ríomhaireacht chandamach, an teicneolaíocht spáis agus tuilleadh nach iad.

Trínár **nIntleacht Shaorga**, tá an Eoraip ar thús cadhnaíochta cheana féin maidir leis an intleacht shaorga a dhéanamh níos sábháilte agus níos iontaofa – chomh maith le dul i ngleic leis na rioscaí a eascraíonn as a mí-úsáid.

Ní mór dúinn ár n-iarrachtaí a dhíriú anois chun go mbeimid inár gceannródaí domhanda i nuálaíocht na hintleachta saorga.

Sa chéad 100 lá, cinnteoidimid go mbeidh rochtain ag gnólachtaí nuathionscanta intleachta saorga agus tionscal na hintleachta saorga ar acmhainneacht sár-ríomhaireachta nua shaincheaptha trí **thionscnamh na Monarchana Intleachta Saorga**.

In éineacht leis na Ballstáit, leis an tionscal agus leis an tsochaí shibhialta, forbróimid **Straitéis maidir leis an Intleacht Shaorga a chur i bhfeidhm** chun borradh a chur faoi úsáidí nua tionsclaíochta na hintleachta saorga

agus chun feabhas a chur ar sholáthar seirbhísí poiblí éagsúla, amhail cúram sláinte.

Den mheon sin, molfaidh mé **Comhairle Eorpach um Thaighde Intleachta Saorga** a bhunú inar féidir linn ár n-acmhainní uile a chomhthiomsú, cosúil leis an gcur chuige a glacadh le CERN.

Chun tacú le forbairt na hintleachta saorga agus teicneolaíochtaí ar thús cadhnaíochta eile, **ní mór don Eoraip leas a bhaint as acmhainneacht neamhshaothraithe sonraí.**

Ní hamháin go gcuireann rochtain ar shonraí go mór leis an iomaíochas – sin beagnach 4% de OTI an Aontais – ach tá sí ríthábhachtach don táirgiúlacht agus do nuálaíochtaí sochaíocha, ó leigheas pearsantaithe go coigilteas fuinnimh.

Mar sin féin, tá an iomarca cuideachtaí san Eoraip ag streachailt chun rochtain a fháil ar na sonraí a theastaíonn uathu – agus úsáideann cuideachtaí móra teicneolaíochta eachtracha sonraí Eorpacha chun a ngnó a chothú.

Agus ardchaighdeán cosanta sonraí á gcinntiú againn, tacóimid le cuideachtaí, trí rochtain oscailte ar shonraí a fheabhsú, go háirithe chun tacú le FBManna oibleagáidí tuairiscithe a chomhlíonadh.

Ní mór don Eoraip a bheith ceannródaíoch freisin i dtaca leis an eolaíocht, an teicneolaíocht agus an tionsclaíocht atá ag teacht chun cinn, an nasc a fhágfaidh go mbeidh an réabhlóid teicneolaíochta seo níos tapúla agus níos claochlaithí.

Is mian liom go mbainfeadh an Eoraip an leas is fearr is féidir as réabhlóid na biteicneolaíochta. Is féidir le biteicneolaíochtaí – a fhaigheann tacaíocht ón intleacht shaorga agus ó uirlisí digiteacha – cuidiú chun codanna iomlána dár ngeilleagar a nuachóiriú, ón bhfeirmeoireacht agus ón bhforaoiseacht go dtí an fuinneamh agus an tsláinte.

Tá réabhlóid sonraí de dhíth san Eoraip.

Sin an fáth a gcuirfimid **Straitéis maidir le hAontas Sonraí na hEorpa** chun cinn. Bainfidh sé sin leas as rialacha sonraí atá ann cheana chun creat dlíthiúil simplithe, soiléir agus comhleanúnach a chinntiú do ghnólachtaí agus do riaracháin chun sonraí a chomhroinnt go rianúil agus ar scála, agus ardchaighdeán phríobháideachais agus slándála á n-urramú ag an am céanna.

Taighde agus nuálaíocht a chur i gcroílár ár ngeilleagair

Beidh iomaíochas na hEorpa – agus a seasamh sa rás i dtreo geilleagar glan digiteach – ag brath ar thús a chur le ré nua nuálaíochta agus clisteachta. Chuige sin, ní mór an taighde agus an nuálaíocht, an eolaíocht agus an teicneolaíocht a chur i gcroílár ár ngeilleagair.

Méadóimid ár **gcaiteachas ar thaighde** chun díriú níos mó ar thosaíochtaí straitéiseacha, ar thaighde bunúsach ceannródaíoch agus ar nuálaíocht shuaiteach, agus ar bharr feabhais eolaíoch.

Chun é sin a dhéanamh, cuirfimid leis an gComhairle Eorpach um Thaighde agus leis an gComhairle Nuálaíochta Eorpach.

Chun é a dhéanamh níos éasca an bhiteicneolaíocht a thabhairt ón tsaotharlann go dtí an mhonarcha agus ansin í a chur ar an margadh, molfaimid **Gníomh Eorpach nua um an mBiteicneolaíocht** in 2025.

Beidh sé sin ina chuid de **Straitéis níos leithne maidir le hEolaíochtaí Beatha na hEorpa** féachaint conas is féidir linn tacú lenár n-aistriú glas agus lenár n-aistriú digiteach agus teicneolaíochtaí ardluacha a fhorbairt.

Chun a bheith ar thús cadhnaíochta sa nuálaíocht, ní mór dúinn na dálaí a chruthú chun go mbeidh rath ar thaighdeoirí. Ciallaíonn sé sin an bonneagar agus na saotharlanna nuálacha a sholáthar a

theastaíonn uathu chun smaointe a thástáil agus a fhorbairt trí **chomhpháirtíochtaí príobháideacha poiblí nua**, amhail comhghnóthais.

Ciallaíonn sé freisin daoine tréitheacha nua a mhealladh agus na daoine is fearr agus is éirimiúla a choinneáil anseo san Eoraip. Chun é sin a dhéanamh, ba mhaith liom an comhoibriú idir ranna taighde, earnáil an ardoideachais agus gnólachtaí a neartú – go háirithe trínár **gComhghuaillíochtaí Ollscoileanna** a neartú.

Borradh as cuimse a chur faoin infheistíocht

Coimisiún na hinfheistíochta a bheidh sa Choimisiún seo.

Ní mór dúinn an maoiniú is gá a chur ar fáil don aistriú glas, don aistriú digiteach agus don aistriú sóisialta. Déanfaimid an infheistíocht phoiblí agus an ghíaráil phoiblí a uasmhéadú agus laghdóimid an riosca a bhaineann le caipiteal príobháideach – ag obair go dlúth leis an **mBanc Eorpach Infheistíochta**.

Ní féidir an infheistíocht sin a mhaoiniú le hairgead poiblí amháin. Dá gcuirfí Aontas na Margaí Caipitil i gcrích, d'fhéadfaí €470 billiún breise d'infheistíocht a mhealladh in aghaidh na bliana.

Ní mór dúinn a bheith níos uailmhianaí chun dul i ngleic leis an easpa caipiteal príobháideach agus lenár margaí atá fós ró-éadomhain.

Níor cheart iallach a chur ar chuideachtaí nuálacha Eorpacha ná ar ghnólachtaí nuathionscanta breathnú ar na Stáit Aontaithe, ar an Áise ná ar mhargaí eile chun maoiniú a sholáthar lena méadú. Ba cheart go mbeidís in ann teacht ar an méid is gá dóibh le fás anseo san Eoraip freisin.

Sin an fáth a gcuirfimid **bearta ionsúcháin riosca** chun cinn chun é a dhéanamh níos

éasca do bhainc thráchtála, d'infheisteoirí agus do chaipiteal fiontair cuideachtaí atá ag fás go tapa a mhaoiniú.

Chun caipiteal a dhíghlasáil agus cothrom iomaíochta a chinntiú, déanfaimid athbhreithniú ar ár gcreat rialála chun aghaidh a thabhairt ar bhacainní a chuireann srian ar an méid caipitil Eorpaigh atá ar fáil chun nuálaíocht a mhaoiniú.

Rachaimid i ngleic le hilroinnt ár margaí airgeadais, rud a fhágann go dtéann €300 billiún de choigilteas theaghlaigh na hEorpa ón Aontas go margaí eachtracha gach bliain.

Chuirge sin, déanfaimid forbairt ar an togra i dtuarascáil Enrico Letta agus molfaimid **Aontas Eorpach Coigiltis agus Infheistíochta**, le margaí baincéireachta agus caipitil san áireamh ann. Cuideoidh sé sin leis an saibhreas ollmhór coigiltis phríobháidigh san Eoraip a ghíaráil chun infheistíocht a dhéanamh sa nuálaíocht, san aistriú glan agus san aistriú digiteach.

Seachas coigilteas príobháideach san Eoraip, tá na hionstraimí airgeadais atá ann faoi láthair sa mhargadh caipitil tábhachtach chun coigilteas a mhealladh ó gach cearn den domhan toisc gur sócmhainn an-sábháilte é ainm an Aontais a bhfuil torthaí tarraingteacha aige.

Ní mór dúinn freisin úsáid níos fearr a bhaint as soláthar poiblí – arb ionann é agus 14% de OTI an Aontais.

D'fhéadfadh méadú éifeachtúlachta 1% sa soláthar poiblí €20 billiún a shábháil in aghaidh na bliana. Agus tá sé ar cheann de na príomhluamháin atá ar fáil chun earraí agus seirbhísí nuálacha a fhorbairt agus chun príomh-mhargaí a chruthú i dteicneolaíochtaí glana agus straitéiseacha.

Molfaidh mé **athbhreithniú ar an Treoir maidir le Soláthar Poiblí**. Leis sin, beifear in ann tús áite a thabhairt do tháirgí Eorpacha sa soláthar poiblí le haghaidh

earnálacha straitéiseacha ar leith. Cuideoidh sé le breisluach Eorpach a chinntiú dár saoránaigh, chomh maith le slándáil an tsoláthair le haghaidh teicneolaíochtaí, táirgí agus seirbhísí rithabhachtacha. Déanfaidh sé ár rialacha soláthair phoiblí a nuachóiriú agus a shimpliú freisin, agus gnólachtaí nuathionscanta agus nuálaithe an Aontais á gcur san áireamh go háirithe.

Maidir le maoiniú poiblí agus infheistíocht phoiblí, is é an chéad tosaíocht a bheidh ann úsáid na n-acmhainní atá ar fáil trí NextGenerationEU agus tríd an mbuiséad reatha a chinntiú

Ag féachaint chun cinn, ní mór go gcuirfidh an Comhaontú maidir le Tionsclaíocht Ghlan ar ár gcumas níos mó infheistíochta a dhéanamh le chéile i dteicneolaíochtaí glana straitéiseacha agus i dtionscail dianfhuinnimh. Ní mór todhchaí thionscail na teicneolaíochta ceannródaíche agus glaine a lonnú san Eoraip.

Sin an fáth a gcuirfidh mé Ciste Eorpach Iomaíochais nua ar aghaidh mar chuid dár dtogra le haghaidh buiséad nua atreisithe sa chéad chreat airgeadais ilbhliantúil eile.

Leis an acmhainneacht infheistíochta sin, déanfar infheistíocht i dteicneolaíochtaí straitéiseacha – ón intleacht shaorga go dtí an spás, an teicneolaíocht ghlan agus an bhith-theicneolaíocht – chun a chinntiú go ndéanaimid teicneolaíochtaí straitéiseacha a fhorbairt agus a mhonarú anseo san Eoraip. Agus cinnteoidh sé go n-úsáidfimid cumhacht ár mbuiséid chun infheistíocht phríobháideach a ghíaráil agus a dhí-rioscú mar chuid dár spriocanna coiteanna.

Tacóidh an Ciste Eorpach Iomaíochais le **Tionscadail Thábhachtacha Leasa Choitinn** (IPCEInna) ionas gur féidir leis an Eoraip a neart comhchoiteann a úsáid chun infheistíocht a dhéanamh le chéile i gcomhthionscadail uailmhianacha – mar a rinneadh cheana ar scála níos lú le ceallraí, hidrigin agus micrileictreonaic.

Déanfaidh mé é níos simplí agus níos tapúla do IPCEInna maoiniú a fháil agus

iad a thosú. Molfar an chéad sraith nua de chomhthionscadail go luath in 2025.

Dul i ngleic leis na bearnaí scileanna agus saothair

Tá athrú ó bhonn ag teastáil ón Eoraip ó thaobh uailmhéine agus gníomhaíochta de – le haghaidh scileanna de gach leibhéal agus le haghaidh oiliúint agus oideachas de gach saghas. Tá an méid sin chomh tábhachtach céanna do ghairmeacha agus do dheiseanna daoine agus atá tá sé dár n-iomaíochas.

Chuirge sin, bunóimid **Aontas na Scileanna**, agus muid ag díriú ar infheistíocht, ar fhoghlaím do dhaoine fásta agus ar fhoghlaím ar feadh an tsaoil, ar choinneáil scileanna agus ar aitheantas a thabhairt do chineálacha éagsúla oiliúna ionas gur féidir le daoine a bheith ag obair ar fud an Aontais seo againne.

Gné lárnach de sin is ea an fhoghlaím ar feadh an tsaoil a leabú san oideachas agus i ngairmeacha mar aon le tacaíocht a thabhairt d'oiliúint agus do dheiseanna gairme na múinteoirí.

Díreoimid ar scileanna bunúsacha a fheabhsú agus molfaimid **Plean Straitéiseach don Oideachas STEM**. Beidh sé d'aidhm aige sin aghaidh a thabhairt ar an meath san fheidhmíocht – rud is ábhar imní é – agus ar an easpa múinteoirí cáilithe i réimsí a bhaineann leis an eolaíocht, teicneolaíocht, innealtóireacht agus matamaitic. Ba cheart go stiúrfadh sé níos mó cailíní agus ban i dtreo oideachas agus gairmeacha STEM.

Tá sé tábhachtach freisin an tosaíocht chuí a thabhairt don ghairmoideachas agus don ghairmoiliúint. Ullmhaíonn siad daoine le haghaidh na hoibre agus tugann siad na scileanna atá á lorg ag cuideachtaí dóibh. Sin an fáth a molfaidh mé **Straitéis Eorpach le haghaidh Gairmoideachais agus Gairmoiliúna**, go sonrach chun borradh a chur faoin líon daoine a bhfuil céim Gairmoideachais dara leibhéil acu.

I ngeilleagar atá ag gluaiseacht go tapa, ní mór dúinn a bheith ag freagairt níos fearr do riachtanais ár gcuideachtaí. Cuirfimid **borradh faoin maoiniú le haghaidh scileanna** i bhuiséad an Aontais agus déanfaimid an maoiniú sin a athdhíriú chun a chinntiú go mbeidh nasc níos fearr aige leis na margaí saothair agus go mbeidh sé níos dírithe ar earnálacha atá rithabhachtach don aistriú glas agus don aistriú digiteach.

Ní mór dúinn deimhin a dhéanamh de go mbainfimid uile tairbhe as scileanna ardcháilíochta beag beann ar cá háit nó conas a fuarthas iad. Sin an fáth go leanfaimid orainn a bheith ag obair i dtreo Céim Eorpach agus go gcuirfimid **Tionscnamh Inaistritheachta Scileanna** chun cinn chun a chinntiú i gcás scil a fuarthas i dtír amháin go n-aithneofar an scil sin i dtír eile.

Ré nua do Chosaint agus Slándáil na hEorpa

‘Gan iarrachtaí ar cóimhéid leis na contúirtí atá ag bagairt uirthi, ní féidir an tsíocháin dhomhanda a choimeád slán’.

Sin an chéad líne de Dhearbhú Schuman agus is ann atá scéal na hEorpa. Labhraíonn sé faoinár stair – scoilte ag cogáí, deighilt agus cuid de na coinbhleachtaí is measa dá bhfaca an domhan riamh.

Cé nárbh fhéidir riamh talamh slán a dhéanamh den tsíocháin san Eoraip, baineadh an dallach dubh dínn leis an gcogadh foghach atá á fhearadh ag Putin san Úcráin.

Léiríonn na hionsaithe samhnasacha neamhthrócaireacha ar ospidéal leanaí, bonneagar fuinnimh agus spriocanna sibhialtacha eile a dhanartha is atá an Rúis faoi stiúir Putin.

Tá an Úcráin ag troid ar son shaoirse, dhaonlathas agus luachanna na hEorpa. Dá láidre an dúshlán, ní mór ár ndiongbháilteacht a bheith chomh láidir céanna.

Infheistíocht a dhéanamh i slándáil na hÚcráine - sin an infheistíocht is fearr i slándáil na hEorpa. Ní mór tacaíocht airgeadais, pholaitiúil agus mhíleata na hEorpa a choinneáil ar bun a fhad is gá.

Bainfimid úsáid as na hionstraimí uile atá ar fáil dúinn, an tSaoráid Eorpach Síochána san áireamh, agus muid ag obair ar gach rud idir riachtanais láithreacha agus iarrachtaí **atógála** amach anseo tríd an tSaoráid don Úcráin.

Más rud é gur cuireadh i gcuimhne dúinn go géar le blianta beaga anuas a leochailí atá an tsíocháin, oscailt súl a bhí ann freisin don Eoraip ó thaobh na modhanna a thabhairt di féin chun í féin a chosaint agus chun aon naimhde ionchasacha a dhíspreagadh. Is

géire ná riamh é sin agus muid ag féachaint ar dhomhan atá níos scoilte agus níos éiginnte, áit nach féidir leis an Eoraip talamh slán a dhéanamh de rud ar bith.

Féachfaimid ar ár mbeartais go léir trí lionsa slándála. Déanfaimid plean le haghaidh cásanna a bhfuil súil againn nach bhfeicfimid riamh – ach ní féidir linn dul sa seans agus gan ullmhú i gceart, sin nó a bheith ró-spleách.

Beocht a chur san Aontas Eorpach um Chosaint

Le blianta beaga anuas, tháinig sé chun solais go bhfuil tearcinfheistíocht sheasta – agus easpa caiteachas éifeachtúil – ag baint lenár gcumais mhíleata.

Chun é sin a chur i gcomhthéacs, idir 1999 agus 2021 tháinig méadú 20% ar an gcaiteachas cosanta comhcheangailte san Aontas. An tráth céanna, tháinig méadú beagnach 300% ar chaiteachas cosanta na Rúise agus méadú beagnach 600% ar chaiteachas cosanta na Síne. Ina theannta sin, tá ár gcaiteachas róscoilte agus neamhleanúnach agus níl sé Eorpach go leor. Ní mór dúinn é sin a athrú.

Beidh ár gcuid oibre as seo go ceann cúig bliana dírithe ar **Aontas Eorpach um Chosaint** a thógáil i bhfírinne.

Is ar na Ballstáit a bheidh an fhreagracht i gcónaí as a dtrúpaí féin – idir theagasc agus imscaradh – ach is iomaí rud is féidir leis an Eoraip a dhéanamh chun tacaíocht a thabhairt agus iarrachtaí a chomhordú ó thaobh bonn tionsclaíoch na cosanta, an nuálaíocht agus an Margadh Aonair a neartú.

Chun cuidiú leis an obair sin ar an leibhéal Eorpach, ceapfaidh mé **Coimisinéir Cosanta**

a bheidh ag obair go dlúth leis an gcéad Ardionadaí/Leas Uachtarán eile i gcomhréir leis an gConradh.

Chun an cur chuige nua a shainiú – agus chun ár riachtanais infheistíochta a shainaithint – déanfaimid **Páipéar Bán maidir le Todhchaí Chosaint na hEorpa** a chur i láthair go comhpháirteach sna chéad 100 lá den sainordú seo.

Gné lárnach den obair seo is ea an chomhpháirtíocht idir an tAontas agus Eagraíocht Chonradh an Atlantaigh Thuaidh (ECAT) a neartú. Leanfaimid dár gcomhar le ECAT a leathnú chun gach bagairt a chumhdach, baoil nua a bhaineann le cibearbhagairtí, bagairtí hibrídeacha nó bagairtí spáis san áireamh – agus neartóimid ár gcomhpháirtíocht thrasatlantach.

I ré na hatharmála, baineann an chéad tosaíocht le méadú mór ar infheistíocht.

Cé go bhfuil dul chun cinn déanta, is ar bhonn náisiúnta den chuid is mó a chaitear buiséid chosanta go fóill. Is fíorbheag an méid caiteachais ar threalamh san Eoraip atá tiomnaithe do sholáthar comhpháirteach an Aontais. Agus is ó áiteanna lasmuigh den Eoraip fós a fhaigheann na Ballstáit formhór mór na n-éadálacha cosanta.

Ní mór dúinn níos mór airgid a chaitheamh, ar bhealach níos fearr, i dteannta a chéile.

Baineann an chéad chúram leis an ngéarghá atá le fórsaí armtha náisiúnta – mar atá sainithe ag na Ballstáit – a atógáil, a athlíonadh agus a chlaohlú.

Cuirfimid **leis an gCiste Eorpach Cosanta**, trí infheistíocht a dhéanamh i gcumais cosanta ardleibhéil i réimsí criticiúla amhail comhrac cabhlaigh, comhrac ar an talamh, aerchomhrac, luathrabhadh spásbhunaithe agus cibear-rabhadh.

Baineann an dara cúram le tuilleadh infheistíochta a dhéanamh inár dtionscal

cosanta. Treiseoidimid an **Clár um an Tionscal Cosanta Eorpach** ar mhaithe le soláthar comhpháirteach a spreagadh chun aghaidh a thabhairt ar na bearnaí is criticiúla i gcumais an Aontais.

Cruthóimid **fíormhargadh aonair le haghaidh táirgí agus seirbhísí cosanta** agus muid ag cur leis an acmhainneacht táirgeachta agus ag cothú an tsoláthair chomhpháirtigh.

Baineann an tríú cúram lenár n-acmhainní a chur le chéile agus na bagairtí coiteanna atá romhainn a chomhrac trí **thionscadail shuaitheanta de chuid an Aontais Eorpaigh um Chosaint**. Ba cheart na tionscadail sin a dhíriú ar na bagairtí coiteanna agus trasteorann is mó atá romhainn.

Agus muid ag obair leis na Ballstáit i ndlúthchomhar le ECAT, molfaimid roinnt Tionscail Chosanta ar mhaithe le Leas na hEorpa i gCoitinne, ag tosú le **AerSciath Eorpach agus an chibearchosaint**.

Cinnteoimid go mbeidh na mórtionscadail sin oscailte do chách agus bainfimid úsáid as na huirlisí go léir atá ar fáil dúinn – idir uirlisí rialaitheacha agus uirlisí airgeadais – chun a chinntiú go ndéanfar iad a dhearadh, a thógáil agus a chur in úsáid ar chríoch na hEorpa a luaithe is féidir.

Ní mór infheistíocht a dhéanamh de réir ár n-uaimhianta.

Tosaíonn sé sin le hinfeistíocht phríobháideach cosanta a dhreasú. Oibreoidh mé leis an mBanc Eorpach Infheistíochta ionas go bhféadfaidh sé cuidiú ó thaobh **tionscadail choiteanna chosanta** agus nuálaíocht cosanta a mhaoiniú agus **a dhí-rioscú**.

Chuige sin, tá gá le hinfeistíocht Eorpach sa chéad chreat airgeadais ilbhliantúil eile. Ach déanfaimid moltaí freisin maidir le riachtanais phráinneacha infheistíochta i réimse na cosanta.

Aontas na hUllmhachta

Sa bhreis ar ár gcumais a mhéadú, tá **uaillmhian nua ó thaobh ullmhacht géarchéime agus ullmhacht slándála** de ag teastáil ón Eoraip.

Beimid ag obair ar **Straitéis d'Aontas na hUllmhachta**, rud atá spreagtha ag an tuarascáil maidir le hullmhacht shibhialta agus mhíleata an Aontais a chuirfidh iarracht ar na Fionlainne Sauli Niinistö i láthair níos déanaí i mbliana.

Mar chuid de sin, beimid ag díriú ar **ár gcumais chibearchosanta a neartú** a thuilleadh, trí chomhordú a dhéanamh ar iarrachtaí cibearchosanta náisiúnta agus trínár mbonneagair chriticiúla a shlánú – go háirithe trí thionscal cibearchosanta iontaofa Eorpach a fhorbairt.

Tá cur chuige coiteann de dhíth ar an Eoraip freisin chun bagairtí nua eile a chosc agus chun ullmhú dóibh, go háirithe bagairtí atá nasctha leis an tslándáil ceimiceán, bhitheolaíoch, raideolaíoch agus núicléach.

Agus muid ag cur le hobair an Údaráis um Ullmhacht agus Freagairt i dtaca le hÉigeandáil Sláinte, cuirfidh straitéis nua i láthair chun tacú le **frithbhearta leighis i gcoinne bagairtí sláinte poiblí**, cuir i gcás iad siúd a bhaineann le slándáil ceimiceán, bhitheolaíoch, raideolaíoch agus núicléach, trí mhodhanna amhail soláthar comhpháirteach agus stoc-charnadh.

Ní mór dúinn oibriú freisin ar **dhíspreagadh comhtháite**. Agus an méid sin á chur san áireamh againn, neartóimid ár **gcur chuige straitéiseach i leith smachtbhannaí** chun a chinntiú gur féidir linn freagairt go solúbtha do bhagairtí nua. Leis sin, féachfar ar an gcaoi ar féidir linn ár gcreat smachtbhannaí i gcoinne cibirionsaithe a leathnú agus ar an gcaoi a bhféadfadh córas nua smachtbhannaí i gcoinne ionsaithe hibrideacha ar an Aontas agus ar a Bhallstáit feidhmiú.

Eoraip níos sábháilte agus níos sláine

An ceart is bunúsaí dá bhfuil ann is ea an ceart aireachtáil slán sábháilte – cibé áit a bhfuilimid agus cibé am den lá atá ann. Ach tá an choireacht eagraithe san Eoraip ag dul i méid. Déanann an choireacht sin dochar do shaolta, do ghnólachtaí agus do gheilleagair iomlána, agus í ag cur airgid i bpócaí coirpeach agus drong.

Ní féidir aon áit fholaithe a bheith ann don choireacht eagraithe san Eoraip – bíodh sin as líne nó ar líne.

Molfaidh mé **Straitéis nua Eorpach maidir leis an tSlándáil Inmheánach**. Cuideoidh sé sin lena chinntiú go ndéanfar an tslándáil a chomhtháthú i reachtaíocht agus i mbeartaíocht an Aontais de réir dearaidh.

Ní mór dúinn uirlisí leormhaithe atá cothrom le dáta a chur ar fáil do ghníomhaireachtaí forfheidhmithe dlí ionas go mbeidh rochtain dhleathach acu ar fhaisnéis dhigiteach, agus cearta bunúsacha á gcosaint san am céanna.

Tá an chuid is mó de ghrúpaí coiriúla gníomhach i níos mó ná trí thír de chuid an Aontais, agus iad ag gluaiseacht i gcónaí idir an saol fisiciúil agus an saol digiteach. Díreoidh ar líonraí coiriúla ardriosca agus a gceannródaithe a tharraingt síos, agus mar chuid de sin, déanfaimid athbhreithniú ar na rialacha atá ann faoi láthair maidir leis an gcoireacht eagraithe.

Molfaidh mé go mbeidh **Europol ina ghníomhaireacht póilíneachta fhíoroibríochtúil** agus go méadófar a fhoireann faoi dhó le himeacht ama. Ba cheart maoirseacht agus sainordú neartaithe a bheith ag gabháil leis sin. Ní mór dúinn cur lena chumas tacú le gníomhaireachtaí náisiúnta um fhorfheidhmiú an dlí.

Ní mór dúinn a chinntiú freisin go dtabharfar na coirpigh os comhair na cúirte. Tríd an **mBarántas Gabhála Eorpach** a

neartú, beidh an deis ag údaráis bhreithiúnacha oibriú le chéile ar dhóigh níos dlúithe chun an méid sin a bhaint amach.

Ní mór dúinn freisin machnamh a dhéanamh ar na cásanna ina mbeidh níos mó cumhachtaí ag teastáil ó **Oifig an Ionchúisitheora Phoiblí Eorpaigh** chun féachaint ar choireacht thromchúiseach trasteorann, go háirithe i gcás an éillithe a bhfuil tionchar aige ar chistí an Aontais agus ar rud é nach féidir leis na Ballstáit déileáil leis astu féin.

Beidh tábhacht ar leith ag baint leis an gcur chuige níos déine sin i leith coireachta a mhéid a bhaineann leis an méadú ar gháinneáil ar dhruaí san Eoraip, atá fós ina chúis le tragóidí pearsanta agus ina fhoinsé maoiniúcháin le haghaidh gníomhaíochtaí coiriúla eile.

Cuirfimid **plean gníomhaíochta Eorpach nua i gcoinne gáinneáil ar dhruaí** chun cinn, agus muid ag obair le comhpháirtithe chun bealaí a dhúnadh agus samhlacha gnó a chosc. Tacóidh sé sin le **Straitéis níos leithne de chuid an Aontais maidir le Calafóirt** lena ndíreofar ar shlándáil, iomaíochas agus neamhspleáchas eacnamaíoch – agus muid ag cur leis an obair atá déanta ag Comhghuaillíocht na gCalafort Eorpach.

Meabhraíonn an méadú tobann a tháinig ar ionsaithe sceimhlitheoireachta le déanaí dúinn nach bhfuil bagairt na líonraí eagraithe – nó na gníomhairí aonair a spreagann siad – imithe i léig.

Is mithid **Clár Oibre nua um Fhrithsceimhlitheoireacht** a bheith ann chun aghaidh a thabhairt ar bhagairtí nua agus bagairtí atá ag teacht chun cinn, amhail an ghné ar líne nó an tírdhreach slándála dhomhanda atá ag athrú an t-am ar fad, agus is mithid cur chuige níos láidre a ghlacadh i leith maoiniú sceimhlitheoireachta agus maidir le frithradacú.

Ar deireadh, ba cheart ár gcur chuige aontaithe i leith na slándála a bheith bunaithe ar **Chóras Cumarsáide Criticiúla Eorpach** nua a bheidh á n-úsáid ag na húdaráis phoiblí atá i gceannas ar an tslándáil agus ar an tsábháilteacht. Beidh sé sin ina chuid dár gcuid oibre chun feabhas a chur ar an gcomhar oibríochtúil laethúil chun an sceimhlitheoireacht agus an choireacht a chomhrac agus chun beatha daoine a shábháil i gcásanna éigeandála.

Teorainneacha coiteanna níos láidre

Cabhraíonn cóstaí agus comhtheorainneacha na hEorpa leis na milliúin duine gach lá dul i mbun gnó, oibre, staidéir agus turasóireachta. Ní mór dúinn ár dteorainneacha a dhéanamh níos sláine agus níos sreabhaí. Ba mhaith le daoine mothú sábháilte gan fanacht rófhada.

Beidh an tAontas ar an gceann scríbe taistil is forbartha ar domhan, le **bainistiú teorann digiteach Eorpach atá lánfheidhmiúil**.

Ach ní mór dúinn freisin ár dteorainneacha a dhéanamh níos sláine chun trasnuithe teorann neamhrialta a chosc agus chun an tAontas a chosaint ar theacht chun cinn bagairtí hibrídeacha agus bagairtí slándála eile.

Le blianta beaga anuas iarradh ar an Eoraip freagairt do bhrúnna ag a teorainneacha – ó Lampedusa go teorainn na Polainne leis an mBealarúis, ó theorainneacha na dtíortha Baltacha agus na Fionlainne go dtí na hOileáin Chanáracha, an Chipir agus níos faide i gcéin.

Bhíomar in ann freagairt gach uair – agus rinneamar ár dteorainneacha a neartú gach uair freisin. Ach tá cur chuige níos láidre agus níos lúfaire de dhíth orainn.

Oibreoimid ar bhonn **cur chuige comhtháite i leith bainistiú teorainneacha**. Neartóimid Frontex, go sonrach chun teicneolaíocht úrscothach a chur ar fáil dó le haghaidh faireachais agus feachtas staide, mar aon lena threalamh agus lena phearsanra féin chun a chinntiú gur féidir leis ár dteorainneacha a chosaint i ngach cás trí rialachas láidir agus cearta bunúsacha a urramú ina n-iomláine.

Chun é sin a bhaint amach, molfaidh mé **go ndéanfar líon na nGardaí Teorann agus Cósta Eorpacha a mhéadú faoi thrí ionas gur 30,000 díobh a bheidh ann**.

Ní ghlacfaimid leo siúd a chuireann slándáil ár dteorainneacha agus ár saoránach i mbaol

le hionsaithe hibrídeacha. Ba cheart gníomhaithe naimhdeacha a bhrúnn daoine thar theorainneacha seachtracha an Aontais chun críoch polaitiúil a aithint mar bhagairt ar ár slándáil agus ba cheart smachtbhannaí a fhorchur orthu.

Déanfaimid níos mó freisin chun oibriú le tíortha nach den Aontas iad maidir le slándáil teorann, go háirithe trí **Straitéis an Aontais maidir le Beartas Víosáí** a fhorbairt chun gur fearr is féidir linn teorainneacha a dhaingniú agus an imirce a bhainistiú.

Ar deireadh, tá sé ríthábhachtach don tsándáil teorann **limistéar saorghluaiseachta Schengen atá iomlán agus lánfheidhmiúil** a chinntiú. Cuirfidh sé sin ar ár gcumas deireadh a chur leis na rialuithe atá fós ann ag na teorainneacha inmheánacha.

Tá a n-inniúlacht maidir le bainistiú teorainneacha agus filleadh léirithe ag an mBulgáir agus ag an Rómáin. Tá siad réidh agus ba cheart go mbainfidís tairbhe iomlán as limistéar Schengen.

Seasamh cothrom agus daingean maidir leis an imirce

Dúshlán Eorpach is ea an imirce, agus ní mór aghaidh a thabhairt uirthi le réiteach Eorpach. Sin an fáth a raibh sé chomh tábhachtach sin gur éirigh linn an **Comhshocrú maidir le hImirce agus Tearmann** a bhaint amach.

Cuideoidh an Comhaontú linn daoine a chosaint, ár dteorainneacha a dhaingniú, nósanna imeachta cothroma éifeachtúla a chinntiú agus an imirce a bhainistiú ar bhealach ordúil agus an dlúthpháirtíocht ina chroílár.

Díreoimid go comhpháirteach ar **gach cuid den Chomhshocrú a chur i bhfeidhm** – agus cuirfimid dlús leis an tacaíocht do na Ballstáit chun a chinntiú go mbeidh an saineolas agus an inniúlacht oibríochtúil agus

airgeadais acu a theastaíonn uathu chun gealltanais dhlíthiúla a chur i bhfeidhm, rud a chuimsíonn infheistíocht a dhéanamh sa chéad bhuiséad fadtéarmach eile a bheidh againn.

Is próiseas dinimiciúil, seachas próiseas aonuaire, é cur i bhfeidhm an Chomhshocraithe. Tá **Straitéis Eorpach maidir le hImirce agus Tearmann** uainn lenár bhfís réamhbhreathnaitheach a leagan amach agus a chur in oiriúint do dhúshláin a bheidh ann amach anseo.

Déanfaimid **cur chuige nua i leith fillte** a chur i láthair, maille le creat reachtach nua chun dlús a chur leis an bpróiseas agus é a shimpliú, chun a chinntiú go gcuirtear filleadh i gcrích le dínit, chun bainistiú cásanna a dhigitiú agus chun a chinntiú go n-aithnítear cinntí um fhilleadh go frithpháirteach ar fud na hEorpa.

Leanfaimid de **chaidrimh straitéiseacha a fhorbairt maidir leis an imirce agus leis an tslándáil** le tíortha nach den Aontas iad, go háirithe tíortha tionscnaimh agus tíortha idirthuais.

Mar chuid de **Chomhshocrú nua don Mheánmhuir**, forbróimid na comhpháirtíochtaí straitéiseacha atá againn cheana agus oibreoimid i dtreo cinn nua a mbeidh freagrachtaí soiléire orthu agus spriocanna insólathartha soiléire acu. Oibreoimid i réimsí leasa choitinn, ó infheistíocht san oideachas, sa bhonneagar, agus sa gheilleagar i gcoitinne go comhpháirtíochtaí tallainne agus conairí dlíthiúla. Cuirfimid dlús lenár gcuid oibre maidir le filleadh, imirce neamhdhleathach a chosc agus smuigleáil daoine a chomhrac. Cinnteoidh mé trédhearcacht mhéadaithe i leith Pharlaimint na hEorpa maidir leis na comhaontuithe sin.

Déanfaimid tuilleadh machnaimh freisin ar bhealaí nua chun cur i gcoinne na himirce neamhrialta, agus an dlí idirnáisiúnta á urramú agus réitigh inbhuanaithe

chothroma á gcinntiú do na himircigh féin ag an am céanna.

Chomhlíon an Eoraip a cuid oibleagáidí idirnáisiúnta i gcónaí san am a chuaigh thart – agus is amhlaidh a bheidh go deo. **Urramóimid cearta an duine i gcónaí** agus cinnteoidimid gur féidir leo siúd a bhfuil ceart fanachta acu é sin a dhéanamh, agus gur féidir leo tacaíocht riachtanach a fháil chun imeascadh i bpobail.

Is bás de bharraíocht é bás amháin sa Mheánmhuir. Tá gá le comhordú níos láidre ar oibríochtaí tarrthála, le tríú tíortha comharsanachta ina measc, agus le cumais faireachais mhéadaithe do Frontex.

Ní ghlacfaimid go deo leis gurb iad na smuigléirí agus na gáinneálaithe ar dhaoine a chinneann cé a thagann chun na hEorpa agus cé na cúinsí faoina dtagann siad. Ní bheidh **aon saoirse ó phionós ann do smuigléirí ná do gáinneálaithe ar dhaoine**.

Déanfaimid a samhail ghnó a scriosadh trí oibriú le comhpháirtithe idirnáisiúnta sa Chomhaontas Dhomhanda chun Smuigleáil Imirceach a Chomhrac agus trí ghníomh daingean a dhéanamh i gcoinne scáthgheilleagar na hEorpa.

Gníomhóimid chun a chinntiú nach ndéanfar dúshaothrú ar imircigh inár margadh saothair agus go mbeidh dálaí maithe oibre acu. Cuirfimid isteach ar dhéantóirí na coire agus déanfaimid iad a ionchúiseamh, trí úsáid a bhaint as cur chuige ‘lean an t-airgead’ chun dul i ngleic le brabúis neamhdhleathacha, trí chomhar feabhsaithe maidir le coigistiú sócmhainní san áireamh. Chuiqe sin, **neartóimid cumas Europol** sa réimse sin.

An cur chuige cothrom daingean sin maidir leis an imirce a bhainistiú, cuirfidh sé ar ár gcumas **bealaí dleathacha** a réiteach.

Tacóimid leis na Ballstáit agus le cuideachtaí trí **imirce dhleathach bunaithe ar**

riachtanais scileanna ár ngeilleagar agus ár réigiún. Cabhróimid chun scileanna náisiúnach tríú tír a mheaitseáil le bearnaí i margadh an tsaothair san Eoraip agus déanfaimid níos éasca é na daoine tréitheacha cearta a mhealladh le rialacha comhchuibhithe maidir le haitheantas a thabhairt do cháilíochtaí.

Tacú le daoine, ár sochaithe agus ár múnla sóisialta a neartú

Is uathúil an cháilíocht saoil atá san Eoraip, rud atá ina bhuntáiste iomaíoch dár ngeilleagar agus ina cholún riachtanach dár sochaí, lena gcinntítear nach bhfágfar aon duine ar lár.

Mar sin féin, bhí tionchar díreach ag géarchéimeanna na mblianta deireanacha ar cháilíocht saoil go leor Eorpach – ón gcostas maireachtála, tithíochta agus fuinnimh, go cothroime ioncaim agus deighiltí agus neamhionannais inár sochaí.

Agus ár sochaithe agus ár ngeilleagair ag athrú leo – agus de réir mar a chuirtear dlús leis an athrú sin – ní mór dúinn ár n-iarrachtaí a dhíriú ar ár gcáilíocht uathúil saoil a chothú agus a fheabhsú. Is gá dúinn ár sochaí a athaontú agus cinnte a dhéanamh de go n-oibreoidh an tsochaí aontaithe sin do chách, ceann ina mbeidh comhdheiseanna agus poist ardcháilíochta.

Is é sin ár ndóigh bheatha Eorpach. Agus ní mór dúinn é a chur chun cinn i gcónaí.

An chothroime shóisialta sa gheilleagar nua-aimseartha

Braitheann dóigh bheatha na hEorpa ar chosaintí agus ar dheiseanna ár samhla sóisialta agus ár ngeilleagair shóisialta margaidh.

Sin an fáth a bhfuil sé chomh tábhachtach sin prionsabail Cholún Eorpach na gCeart Sóisialta a fhíorú ar fud an Aontais, agus múnla sóisialta gach tíre á urramú.

Tá ugach nua de dhíth orainn i réimsí ina bhfuil gá le tuilleadh dul chun cinn agus leagfaimid an obair sin amach i **bPlean Gníomhaíochta nua maidir le cur i bhfeidhm Cholún Eorpach na gCeart Sóisialta**.

Cuimseofar ann tionscnaimh lena bhféachfaí ar an tionchar atá ag an digitiú ar shaol na hoibre, ó bhainistiú na hintleachta saorga, go teilea-obair agus an tionchar atá ag cultúr ‘ar dualgas i gcónaí’ ar mheabhairshláinte daoine. Níor chóir níos lú ceart a bheith ann de thoradh cineálacha nua oibre, agus molfaidh mé ceart chun dícheangail a thabhairt isteach.

Ní mór daoine agus a bpoist a bheith i gcónaí i gcroílár ár ngeilleagair shóisialta margaidh, fiú agus ár dtionscail agus ár ngeilleagair ag athrú. Caithfimid **aistriú atá cóir do chách** a chinntiú.

Sin an fáth a molfaidh mé **Treochlár Post ar Ardchaighdeán**, treochlár a fhorbrófar i gcomhar leis na comhpháirtithe sóisialta. Tacóidh sé le pá cothrom, dálaí maithe oibre, oiliúint agus aistrithe córa post d’oibrithe agus do dhaoine féinfhostaithe, go háirithe trí chumhdach cómhargála a mhéadú.

Agus cuirfimid go mór lenár maoiniú le haghaidh aistriú cóir sa chéad bhuiséad fadtéarmach eile.

Beidh sé sin mar chuid de ghealltanas athnuaite an t-idirphlé sóisialta Eorpach a neartú tráth a bhfuil athrú eacnamaíoch agus sóisialta ar siúl. In éineacht leis na ceardchumainn Eorpacha agus na fostóirí, tabharfaimid isteach **Comhaontú nua maidir le hIdirphlé Sóisialta Eorpach** go luath in 2025.

Beidh sé sin ina chuid dár gcuid oibre chun cuidiú le daoine rochtain a fháil ar na cosaintí agus na seirbhísí riachtanacha a theastaíonn uathu, chomh maith le dul i ngleic le bunchúiseanna na bochtaineachta **tríd**

an gcéad Straitéis Frithbhochtaineachta de chuid an Aontais riamh.

Mar chuid de sin, neartóimid an Ráthaíocht do Leanaí chun an t-eisiamh sóisialta a chosc agus a chomhrac trí oideachas, cúram sláinte agus seirbhísí poiblí riachtanacha eile.

Ní mór dúinn aghaidh a thabhairt go práinneach ar an ngéarchéim tithíochta atá os comhair na milliún teaghlach agus daoine óga.

Tá ardú ollmhór tagtha ar an gcéatadán d'ioncam teaghlaigh a chaitear ar thithíocht. Tá ardú as cuimse ag teacht ar chíosanna agus ar phraghsanna tithe. Tá bearna shuntasach infheistíochta ann atá ag dul i méid maidir le tithíocht shóisialta agus inacmhainne chomh maith.

Chun tacú leis na Ballstáit aghaidh a thabhairt ar na saincheistanna sin, ceapfaidh mé Coimisinéir a mbeidh an tithíocht i measc a chuid freagrachtaí agus cuirfidh mé **Plean Eorpach maidir le Tithíochta Inacmhainne** chun cinn den chéad uair riamh.

Tabharfar aghaidh sa phlean sin ar spreagthaí struchtúracha, forbrófar straitéis maidir le tógáil tithíochta, cuirfear cúnamh teicniúil ar fáil do chathracha agus do na Ballstáit agus díreofar ar infheistíocht.

Oibreoidh leis an mBanc Eorpach Infheistíochta ar **ardán infheistíochta uile-Eorpach do thithíocht inacmhainne agus inbhuanaithe** chun níos mó infheistíochta príobháidí agus poiblí a mhealladh.

Is é an chéad chéim a ghlacfar go molfar leachtacht a chur sa mhargadh trí chead a thabhairt do na Ballstáit na hinfeistíochtaí beartais comhtháthaithe atá beartaithe i dtithíocht inacmhainne a dhúbailt.

Déanfaimid athbhreithniú freisin ar ár rialacha maidir le státhabhair chun bearta tacaíochta tithíochta a chumasú, go háirithe

i gcás tithíocht inacmhainne atá tíosach ar fhuinneamh agus tithíocht shóisialta.

Cuid lárnach de sin is ea an **Ciste Aeráide Sóisialta** a chur i bhfeidhm go tapa agus go héifeachtach, rud a chabhróidh go háirithe le hathchóirithe agus le rochtain ar thithíocht inacmhainne atá tíosach ar fhuinneamh.

Ceithre bliana ó shin, sheol mé **Bauhaus Eorpach Nua**, lena dtugtar le chéile an inbhuanaitheacht, an cuimsiú agus an inacmhainneacht, an chruthaitheacht agus an nuálaíocht. Agus déanfaimid an pobal sin a mhéadú anois.

Ní mór dúinn aghaidh a thabhairt freisin ar na neamhionannais eile lena ndéantar comhtháthú ár sochaithe a thástáil. Rachaimid **i ngleic le bunchúiseanna an athraithe dhéimeagrafaigh** agus rachaimid in oiriúint do réaltachtaí nua. Sna blianta amach romhainn, beidh dúshlán éagsúla roimh an Eoraip, ó phinsin go seirbhísí poiblí, ó ghanntanais lucht saothair go hinbhuanaitheacht fhioscach agus éagothromaíochtaí idir glúine agus réigiúin.

Féachfaimid ar rannpháirtíocht i margadh an tsaothair a mhéadú, go háirithe rannpháirtíocht na mban agus na ndaoine óga, ar éagothromaíochtaí réigiúnacha a laghdú ionas gur féidir le daoine fanacht ina réigiúin féin sa bhaile, agus ar thacú le tuismitheoirí óga cothromaíocht shláintiúil oibre is saoil a bhaint amach.

Beidh na réigiúin i gcroílár ár gcuid oibre i gcónaí.

Teastaíonn **beartas comhtháthaithe agus fáis neartaithe** uainn agus na réigiúin i gcroílár an bheartais sin. Ní mór é a dhearadh i gcomhpháirtíocht le húdaráis náisiúnta, réigiúnacha agus áitiúla. Tabharfaimid aghaidh ar éagothromaíochtaí réigiúnacha agus sóisialta agus cinnteoidh go mbeidh **ceart éifeachtach ag gach saoránach fanacht** san áit a bhfuil siad sa bhaile ann.

Mar chuid de sin, beidh orainn athchóirithe agus infheistíochtaí a shlógadh chun cabhrú le forbairt an mhéid a bhíonn de dhíth ar phobal chun go mbeidh rath air: seirbhísí poiblí agus gníomhaíochtaí príobháideacha, oideachas agus scileanna, iompar agus nascacht dhigiteach.

Agus cuirfimid san áireamh na **dúshláin shonracha eacnamaíocha agus shóisialta atá os comhair na n-oileán**, amhail tithíocht, iompar, uisce agus bainistiú dramhaíola. Leanfaimid d'aghaidh a thabhairt ar na dúshláin atá roimh na réigiúin is forimeallaí freisin.

Ár sochaithe a athaontú, tacaíocht a thabhairt dán ndaoine óga

Ceann de na príomhpointí a tháinig chun cinn sna toghcháin Eorpacha is déanaí ba ea míshuaimhneas sa tsochaí, rud a chruthaigh easaontas inár bpobail agus a lig d'antoscigh teacht i dtír ar eagla na ndaoine.

Oibreoidimid chun cearta daoine ar de ghrúpaí mionlaigh iad san Eoraip a chosaint.

Ní mór dúinn a chinntiú freisin nach ndéanfar dochar do na glúine atá le teacht trí chinntí a dhéantar inniu agus go mbeidh níos mó dlúthpháirtíochta agus rannpháirtíochta ann idir daoine ar aoiseanna éagsúla. Ceapfaidh mé Coimisinéir a mbeidh sé de fhreagracht air **cothroime idirghlúine** a chinntiú.

Ní mór dúinn ár sochaí a athaontú – tríd an oideachas, trí thacú le daoine óga agus trí chur leis rudaí atá i gcoiteann againn mar shaoránaigh Eorpacha.

Déanfaimid Erasmus+ a neartú - i gcás na gairmoiliúna, mar shampla - ionas gur féidir le níos mó daoine tairbhe a bhaint as. Tá sé seo rithabhachtach le go mbeidh daoine in ann scileanna a fhorbairt agus taithí chomhroinnte a chruthú agus tuiscint níos fearr ar a chéile a bheith acu.

Beidh sé sin mar chuid de ghealltanas níos leithne chun níos mó saoirse agus freagrachta a thabhairt do dhaoine óga laistigh dár sochaithe agus dár ndaonlathais.

Beidh an Coláiste nua ar thús cadhnaíochta chuige sin.

Iarrfaidh mé ar gach Coimisinéirí a chéad **Idirphlé bliantúil maidir le Beartas don Óige a eagrú laistigh den chéad 100 lá** den sainordú. Tionólfar na seisiúin idirphlé sin gach bliain.

Is mian liom a chinntiú gur féidir le daoine óga a nguth a úsáid – a nguth féin – chun cabhrú linn ár dtodhchaí a mhúnlú.

Sin an fáth a gcuirfidh mé **Bord Comhairleach um an Óige de chuid an Uachtaráin** ar bun le daoine óga ó gach Ballstát le gur féidir leo comhairle a chur orm maidir le saincheistanna atá tábhachtach dá bpiaraí ina bpobal féin agus le gur féidir leo a bheith ina mbonn braite i leith smaointe a fhorbróidh an Coimisiún.

Creidim go bhfuil **meabhairshláinte ár leanaí agus ár ndaoine óga a chosaint** ar cheann de na dúshláin is mó atá romhainn le deich mbliana anuas, go háirithe ar líne.

Tá na luathbhlianta agus na déaga criticiúil d'fhorbairt na hinchinne agus na pearsantachta agus is tréimhsí iad sin ina mbíonn daoine óga leochaileach i leith na ndíobhálacha a bhaineann leis na meáin shóisialta agus leis an iomarca ama a chaitheamh ag breathnú ar scáileáin. Ní mór dúinn díospóireacht oscailte atá bunaithe ar fhianaise a bheith againn ar an tsaincheist seo. Is é sin an fáth go seolfaimid **fiosrúchán uile-Aontais ar na tionchair níos leithne atá ag na meáin shóisialta ar an bhfolláine**.

Rachaimid i ngleic le teicnicí neamheiticíúla a mbaineann ardáin ar líne úsáid astu trí ghníomhú i leith **dearadh andúile seirbhísí ar líne**, cuir i gcás scrolláil gan teorainn, feidhm réamhshocráithe uathsheinnte nó brúfhógraí. Rachaimid i ngleic go daingean

le treocht mhéadaitheach na hiompraíochta mí-úsáidí ar líne le **plean gníomhaíochta i gcoinne na cibearbhulaíochta**.

Ar deireadh, díreoidimid ar na rudaí atá ina gcuid dár ndóigh bheatha Eorpach: ár gcultúr agus ár stair. Is mian liom é a dhéanamh níos éasca do dhaoine – go háirithe na glúnta óga – leas a bhaint as ár **n-oidhreacht chultúrtha** atá saibhir éagsúil.

Aontas an chomhionannais

Cúig bliana ó shin, thugamar faoi Aontas an Chomhionannais a thógáil. Táim bródúil as an dul chun cinn stairiúil atá déanta againn. Ach ní ann don chomhionannas ann fós do mhórán daoine. Ní mór dúinn géarú a thuilleadh fós ar ár ndícheall ionas gur féidir le gach duine maireachtáil, dul in inmhe agus dul i mbun ceannaireachta gan beann ar cé hé.

Is é sin an fáth a gcuirfidh mé de chúram ar **Choimisinéir um Chomhionannas** straitéis nuashonraithe um chomhionannas LGBTIQ agus straitéis nua frithchíníochais a fhorbairt don tréimhse tar éis 2025.

Leanfaimid dár n-iarrachtaí laethúla a neartú chun comhionannas inscne a bhaint amach. Is réimse é seo ina bhfuil dul chun cinn stairiúil déanta againn – ó mhná ar bhoird go trédhearcacht pá. Ach tá treochtaí ar cúis imní iad ag teacht chun cinn – ó sciúirse an fheimeamharaithe agus an fhoréigin in aghaidh na mban go bacainní ar mhná cur chun cinn a dhéanamh ina ngairmeacha beatha nó ina n-oideachas.

Chun ár dtiomantas a neartú, molfaimid **Straitéis nua um Chomhionannas Inscne don tréimhse tar éis 2025**. Leagfaidh sé amach ár bplean chun cearta na mban a neartú i ngach réimse, ón gcomhrac i gcoinne an fhoréigin inscnebhunaithe go mná a chumhachtú sa pholaitíocht agus sa mhargadh saothair, ar fud an Aontais, agus ar fud institiúidí an Aontais.

Ar deireadh, tacaím leis an smaoineamh maidir le **Treochlár um Chearta na mBan**, rud a chuirfimid i láthair ar an gcéad Lá Idirnáisiúnta na mBan eile.



Ár gcáilíocht saoil a chothabháil: slándáil bia, uisce agus an dúlra

Tá cáilíocht saoil na hEorpa ag brath ar sholáthar slán inacmhainne bia áitiúil ar ardchaighdeán a bheith ann. **Is cuid lárnach dár ndóigh bheatha Eorpach í an fheirmeoireacht – agus ní mór é sin a bheith amhlaidh i gcónaí.**

Is a bhuí leis na 9 milliún feirm san Eoraip – agus leis an earnáil agraibhia i gcoitinne – a bhfuil an bia is sláintiúla agus is airde cáilíocht ar domhan ag an Eoraip. Is sócmhainn straitéiseach é sin agus ciallaíonn sé go bhfuil an Eoraip ríthábhachtach don tslándáil bia ar fud an domhain.

Tá ár bhfeirmeoirí agus ár gceantair thuaithe faoi bhrú atá ag dul i méid de shíor – ó thionchar an athraithe aeráide go hiomaíocht dhomhanda éagórach, praghsanna fuinnimh níos airde, easpa feirmeoirí óga nó deacrachtaí teacht ar chaipiteal. Ag an am céanna, tá iarrachtaí ollmhóra á ndéanamh acu chun cur leis an aistriú glas, mar shampla trí réitigh dhúlra bhunaithe.

Is mian liom leanúint de bheith i dteagmháil le feirmeoirí, le lucht ceaptha beartas, leis an tsochaí shibhialta, le páirtithe leasmhara agus le saoránaigh ionas gur féidir linn córas talmhaíochta agus bia atá iomaíoch agus athléimneach a thógáil.

Sin an fáth ar thionóil mé Idirphlé Straitéiseach maidir le Talmhaíocht, a gcuirfear tuarascáil faoi i láthair go luath. Ag tógáil ar na moltaí sin, cuirfidh mé **Fís don Talmhaíocht agus don Bhia** i láthair sa chéad 100 lá ag féachaint ar conas iomaíochas agus inbhuanaitheacht fhadtéarmach ár n-earnála feirmeoireachta a chinntiú laistigh de theorainneacha ár bpláinéid.

Chuige sin, tá sé **ríthábhachtach go mbeidh ioncam cóir leordhóthanach ag feirmeoirí**. Níor cheart iallach a bheith orthu a dtáirgí a

dhíol go córasach faoi bhun na gcostas táirgthe.

Cosnóidh mé i gcónaí beartas ioncaim an Aontais d'fheirmeoirí na hEorpa agus **cinnteoidh mé** go ndíreofar ar bhuiséad an Aontais agus ar ár **gcomhbheartas talmhaíochta**, agus go n-aimseofar an chothromaíocht cheart idir dreasachtaí, infheistíochtaí agus rialáil.

Ní mór dúinn a chur ar chumas feirmeoirí a gcuid talún a shaothrú gan rómhaorlathas, tacú le feirmeacha teaghlaigh, agus **luach saothair a thabhairt d'fheirmeoirí atá ag obair leis an dúlra**, ag caomhnú ár mbithéagsúlachta agus ár n-éiceachóras nádúrtha agus ag cabhrú chun ár ngeilleagar a dhícharbónú i dtreo aeráidneodracht a bhaint amach faoi 2050.

Tacóimid le hiomaíochas ár slabhra luacha bia ar fad trí infheistíocht agus nuálaíocht ar an bhfeirm, ach freisin i gcomharchumainn, inár ngnólachtaí agraibhia agus san iliomad FBManna san earnáil.

Ós rud é gur minic gurb iad feirmeoirí an chuid is leochailí den slabhra sin, ní mór dúinn na míchothromaíochtaí atá ann cheana a cheartú, seasamh na bhfeirmeoirí a neartú agus iad a chosaint tuilleadh ar chleachtais éagóracha trádála.

I dteannta a chéile, léireoidh mé go gcosnóidh an Eoraip a **biafhlaithéis** féin agus go gcosnóidh sí iad siúd a chuireann bia ar fáil dúinn go léir.

Ní mór ár n-iascairí, idir fhir is mhná, a bheith ina measc sin. Cinntíonn siad go mbíonn an t-iascach i gcroílár ár bpobal cósta agus ár ngeilleagar cósta. Cuireann siad soláthar sláintiúil bia ar fáil do mhargaí áitiúla, náisiúnta agus idirnáisiúnta.

Ceapfaidh mé Coimisinéir Iascaigh agus Aigéan a mbeidh sé de chúram air a chinntiú go leanfaidh an earnáil de bheith inbhuanaithe iomaíoch athléimneach, chomh maith le cothrom iomaíochta a chaomhnú do shlabhra iascaigh na hEorpa.

Díreoidh **Comhshocrú Eorpach na nAigéan** ar bhorradh a chur faoin ngeilleagar gorm agus ar dhea-rialachas agus inbhuanaitheacht ár n-aigéan a chinntiú i ngach gné díobh.

Ní mór dúinn freisin leanúint de **chosaint a thabhairt dár ndomhan nádúrtha**. Ár bhforaoisí agus ár gcoillearnacha, ár mbogaigh agus ár bhféarthailte, ní hamháin gurb iad ár mbaile agus tírdhreacha shaol mhuintir na hEorpa iad, ach tá siad ríthábhachtach chun ár n-aeráid a rialáil agus slándáil bia agus uisce a chinntiú.

Díreoidimid ar dhreasachtaí agus ar chur i bhfeidhm cothrom éifeachtúil, go háirithe chun a chinntiú go mbainfidimid ár ngealltanais idirnáisiúnta maidir leis an mbithéagsúlacht amach, amhail na gealltanais a tugadh i g**Comhaontú Kunming-Montréal**.

Oiriúnú don athrú aeráide, ullmhacht agus dlúthpháirtíocht

Ceann de na rioscaí is mó dár slándáil is ea tionchar an athraithe aeráide. Tá níos mó áiteanna san Eoraip á mbualadh leis an adhamsir le tuilte, dóiteáin agus triomaigh i rith na bliana, agus ar fud an Aontais seo againne.

A bhuí le Sásra an Aontais um Chosaint Shibhialta, cabhraíonn pearsanra, eitleáin agus héileacaptair ó gach cearn den Eoraip chun dóiteáin foraoise a chur amach agus dul i ngleic leis an tionchar tubaisteach a bhíonn ag tuilte, stoirmeacha nó triomaigh.

Sin í an Eoraip ar a seacht ndícheall ó thaobh na praiticiúlachta de. Ach tá a fhios againn

go mbeidh níos mó de sin de dhíth orainn, agus níos minice, de réir mar a théann an pláinéad agus de réir mar a dhéantar an damáiste don saol, don talamh agus don mhaoin ar bhonn níos minice, níos déine agus níos tubaistí.

Tá acmhainní níos fearr agus rochtain níos fearr ar níos mó sócmhainní Eorpacha de dhíth orainn. Tá cur chuige uile-shochaí de dhíth orainn agus ní mór dúinn na huirlisí go léir is gá a úsáid, na huirlisí míleata ina measc.

Creidim gur gá dúinn oibriú i dtreo **Sásra Eorpach um Chosaint Shibhialta**, muid ag breathnú ar gach gné de bhainistiú géarchéime agus tubaistí, chomh maith le hathléimneacht an phobail a fhorbairt. Cuirfidh sé sin freisin le tuarascáil an Uachtaráin Niinistö.

Agus aeráid na hEorpa ag téamh ag ráta níos tapúla ná an meán domhanda, ní mór dúinn dlús a chur leis an obair i dtaca le **hathléimneacht agus ullmhacht i leith na haeráide**.

Leagfaimid amach na rioscaí agus na riachtanais ullmhachta i dtaca le bonneagar, fuinneamh, uisce, bia agus talamh i gcathracha agus i gceantair thuaithe, chomh maith leis an ngá atá le sonraí agus le córais réamhrabhaidh.

Beidh sé sin mar chuid de **Phlean Eorpach um Oiriúnú don Athrú Aeráide**, chun tacú leis na Ballstáit go háirithe i dtaca le hullmhacht agus pleanáil agus chun measúnuithe riosca rialta eolaíochtbhunaithe a chinntiú.

Ní mór an méid sin a bheith fite fuaite i **neartú slándáil uisce na hEorpa**. Is acmhainn fhíor-riachtanach é an t-uisce do shlándáil ár mbia, ár bhfuinnimh agus ár ngeilleagair ach tá sé faoi strus níos mó ná mar a bhí riamh i ngeall ar an athrú aeráide agus ar éilimh mhéadaitheacha.

Tá **Stratéis Athléimneachta Eorpaí nua maidir le hUisce** de dhíth orainn chun a chinntiú go ndéanfar foinsí a bhainistiú i gceart, go dtabharfar aghaidh ar ghanntanas, agus go bhfeabhsóimid buntáiste nuálach iomaíoch ár dtionscal uisce agus go nglacfaimid cur chuige an gheilleagair chiorclaigh. Mar chuid de sin, stiúrfaimid iarrachtaí chun géarstrus uisce a mhaolú agus a chosc ar fud an domhain.

Ár ndaonlathas a chosaint, ár luachanna a chaomhnú

Beidh todhchaí na hEorpa i ndomhan atá briste ag brath ar dhaonlathas láidir a bheith againn agus ar na luachanna a thugann na saoirsí agus na cearta ar mór againn iad a chosaint.

Ár ndaonlathas a chosaint

Tá ár gcórais dhaonlathacha agus ár n-institiúidí daonlathacha faoi ionsaí. Tá méadú tagtha ar an líon bagairtí ó ghníomhaithe inmheánacha agus eachtracha – bíodh rialtais naimhdeacha nó gníomhaithe neamhstáit i gceist. Tá sé níos deacra anois na modhanna a úsáidtear chuige sin a rianú, tá siad níos díobhálaí agus tá sé níos éasca iad a úsáid le huirlisí digiteacha agus leis na meáin shóisialta.

Léiríonn sé sin go bhfuil athrú mór tagtha ar an spás faisnéise, is é sin an t-aistriú ó fhoinsí meán eagarthóireachta go hábhar ó úsáideoirí a ndéanann ardáin idirghabháil air agus a bhrúnn na halgartaim. Tá saoirsí nua againn mar gheall ar an méid sin ach laghdaíonn sé an costas a bhaineann le hionramháil ar fhaisnéis agus déanann sé níos éasca don Rúis agus do ghníomhaithe eile dlús a chur leis an gcogaíocht faisnéise.

Ní mór dúinn níos mó a dhéanamh chun ár ndaonlathas a chosaint.

Is é sin an fáth a molfaidh mé **Sciath nua um an Daonlathas Eorpach**. Mar chuid de sin, oibreoimid chun cur i gcoinne ionramháil agus cur isteach eachtrach ar fhaisnéis ar líne, ag tógáil ar na samplaí de Viginum sa Fhrainc nó de Ghníomhaireacht na Sualainne um Chosaint Shíceolaíoch.

Is é an aidhm atá ann feachtas staide a mhéadú, trí bhréagaisnéis agus ionramháil ar fhaisnéis a bhrath, a anailísiú agus a chomhrac ar bhealach réamhghníomhach.

Díreoimid ar **athléimneacht agus ullmhacht na sochaí**, trí litearthacht dhigiteach agus litearthacht sna meáin a mhéadú agus trí bhorradh a chur faoin gcosc tríd an réamhbhréagnú. Cruthóimid **líonra Eorpach seiceálaithe fíricí** agus cuirfimid ar fáil i ngach teanga é.

Leanfaimid ag cur dlús leis an **bhforfheidhmiú digiteach** chun a chinntiú go ndéanfar faisnéis chúbláilte nó mhíthreorach a bhrath, a mharcáil agus, i gcás inarb iomchuí, a bhaint de i gcomhréir leis an nGníomh um Sheirbhísí Digiteacha.

Ar deireadh, tabharfaimid aghaidh freisin ar **dhomhainbhrionnuithe atá níos réalaíche ná riamh**, rud a raibh tionchar aige ar thoghcháin ar fud na hEorpa. Cinnteoimid go gcuirfear na ceanglais trédhearcachta ón nGníomh um an Intleacht Shaorga chun feidhme agus go neartóimid ár gcur chuige maidir le hábhar a tháirgtear leis an intleacht shaorga.

Agus ár ndaonlathas á chosaint againn, urramóimid i gcónaí ár dtiomantas seasmhach don **tsaoirse cainte a chaomhnú agus a chur chun cinn**.

An smacht reachta a neartú

Bíonn daonlathas agus geilleagar na hEorpa ag brath ar an smacht reachta. A bhuí leis, bíonn rath ar ár tsochaí, cinntíonn sé go gcosnaítear cearta, go ngearrtar pionós ar aon éilliú, agus go bhforfheidhmítear conarthaí.

Níl aon chríochphointe ag an smacht reachta. Is ann do dhúshláin ar fud na hEorpa, ar scálaí éagsúla agus ó thaobh saincheisteanna éagsúla de.

Tá go leor déanta againn le cúig bliana anuas. Tá acmhainní níos fearr againn anois ná

riamh chun dul i ngleic le saincheistean a bhaineann leis an smacht reachta ar bhealach oibiachtúil - agus ar an mbealach céanna - i ngach Ballstát. Ach tá treocheartaí ag teacht chun cinn ar cúis le himní iad freisin.

Beidh sé de dhualgas orainn a bheith ag obair gach lá chun an smacht reachta a neartú.

Leanfaimid d'fheabhas a chur ar an monatóireacht agus ar an tuairisciú a dhéanaimid, chomh maith le srianta agus ceartúcháin a neartú, go háirithe trí chur i bhfeidhm na moltaí a rianú.

Tá sé feicthe againn sa **Tuarascáil maidir leis an Smacht Reachta** an chaoi a gcuireann idirphlé le dul chun cinn. Ní mór dúinn an tuarascáil a dhaingniú anois agus a chinntiú go bhféachann sí ar na saincheistean uile atá ann ar fud na hEorpa.

Cuirfimid gné a bhaineann leis an Margadh Aonair leis an tuarascáil chun aghaidh a thabhairt ar shaincheistean a bhaineann leis an smacht reachta a dhéanann difear do chuideachtaí, go háirithe FBManna, a oibríonn thar theorainneacha. Cuirfimid tíortha aontachais eile san áireamh sa Tuarascáil maidir leis an Smacht Reachta de réir mar a bheidh siad réidh.

Déanfaimid infheistíocht chun an smacht reachta a chaomhnú. Molfaidh mé maoiniú ón Aontas a chur ar fáil do bhearta náisiúnta, mar shampla chun an t-éilliú a chomhrac, agus chun leasanna airgeadais an Aontais a chosaint.

Chun maoiniú ón Aontas a fháil, is gá an smacht reachta a urramú.

Chun an méid sin a chinntiú, forbróimid nasc níos dlúithe idir na moltaí sa Tuarascáil maidir leis an Smacht Reachta agus an tacaíocht airgeadais. Agus cinnteoidimid go mbeidh coimircí láidre faoin smacht reachta sa bhuiséad fadtéarmach amach anseo – mar

shampla, an **córas ginearálta coinníollachta** a mbeidh feidhm aige maidir le cistí uile an Aontais.

Foghlaimimid freisin ó NextGenerationEU, a léirigh dúinn conas is féidir an buiséad a nascadh le hathchóirithe a neartaíonn an smacht reachta.

Ní mór dúinn leanúint d'fhorfheidhmiú trí sháruithe agus de chur i bhfeidhm treisithe **shásra Airteagal 7** a úsáid go héifeachtach, in Aontas méadaithe amach anseo san áireamh.

Ceann de bhunphrionsabail an smachta reachta agus an daonlathais i gcoitinne is ea **saoirse na meán**.

I saol na meán atá ag éirí níos tapúla i gcónaí, agus i saol na bréagaisnéise atá ag éirí níos tapúla ná sin fós, ní mór dúinn gach rud is féidir a dhéanamh chun tacú le meáin atá saor ar fud an Aontais seo againne.

Cuirfimid an Gníomh Eorpach um Shaoirse na Meán chun feidhme agus **cuirfimid lenár dtacaíocht agus lenár gcosaint do mheáin neamhspleácha agus d'iriseoirí neamhspleácha**, agus srian á chur ar ghníomhartha brú agus iompair mhí-eiticiúil.

Saoránaigh a chur i gcroílár ár ndaonlathais

Ba chéimeanna móra iad an Chomhdháil ar Thodhchaí na hEorpa agus rath na bPainéal Saoránach Eorpach i dtreo daonlathas níos dioscúrsaí agus daoine a mhealladh isteach ar bhealaí eile seachas toghcháin nó polaitíocht.

Anois ní mór dúinn **rannpháirtíocht na saoránach a chur chun cinn ar fud an Aontais**.

Gach bliain, roghnóimid réimsí beartais agus tograí ar a mbeadh an tionchar is mó ag **moltaí ó Phainéal Saoránach Eorpach**. Déanfaimid obair leantach ar na moltaí uathu, ar nós na moltaí ón bPainéal in 2024

maidir leis an bhfuath sa tsochaí a chomhrac.

Den mheon céanna, cuirfimid **dlús lenár rannpháirtíocht le heagraíochtaí na sochaí sibhialta** a bhfuil saineolas agus ról tábhachtach acu maidir le saincheistanna sochaíocha sonracha a chosaint agus cearta an duine a chaomhnú.

Ní mór dúinn a chinntiú go dtabharfar cosaint níos fearr don tsochaí shibhialta ina cuid oibre.

Oibreoidimid freisin le comhairleoirí áitiúla ar rannpháirtíocht na saoránach chun tuiscint níos fearr a fháil ar an tionchar a bhíonn ag an Eoraip ar an saol laethúil. In éineacht le Coiste na Réigiún, táimid ag obair cheana féin le líonra ina bhfuil níos mó ná 3,000 comhairleoir áitiúil, agus ba cheart dúinn an líonra sin a neartú sna cúig bliana amach romhainn.

An Eoraip Dhomhanda: Ár gcumhacht agus ár gcomhpháirtíochtaí a ghíaráil

I ndomhan atá chomh contúirteach agus a bhí sé leis na blianta, ní mór don Eoraip a bheith níos teanntásaí agus a leasanna straitéiseacha á saothrú aici.

Tá cogadh foghach na Rúise – rud atá bunaithe ar mhian impiriúil Putin an Úcráin agus a todhchaí san Eoraip a scriosadh – mar chuid d'ionsaí córasach níos leithne ar an Eoraip, ar ár luachanna agus ar an ord idirnáisiúnta riailbhunaithe.

Tá an Úcráin ag troid gach lá ar son na saoirse atá againn – agus ní mór dúinn oibriú ar son a saoirse féin.

Leanfaidh sé sin de bheith ina phríomhthosaíocht dúinn sa bhaile agus go hidirnáisiúnta, agus déanfaimid ár gcomhpháirtithe a mhisniú chun tacú le riachtanais ghearrthéarmacha agus leis na hiarrachtaí atógála fadtéarmacha.

Ní féidir linn féachaint ar an gcogadh seo ar thalamh na hEorpa mar eachtra gan chomhthéacs. Tá deighilt le brath ar fud an domhain faoi láthair. Ráiteas intinne a bhí sna blianta deireanacha ó shraith nua daoine tiarnúla, ón Iaráin go dtí an Chóiré Thuaidh go dtí an Rúis agus níos faide i gcéin, daoine a oibríonn chun deighilt a chothú agus ord idirnáisiúnta malartach a chruthú bunaithe ar léarscáileanna nuachumtha, smaointe impiriúla agus réimsí tionchair

Tá an cogadh in Gaza agus díchobhsú an Mheánoirthir ina iomláine ina gcúis le doirteadh fola agus éagobhsaíocht ar fud an réigiúin. Tá coups agus coimhlintí ag éirí níos measa ar fud an domhain.

Táimid ar thairseach ré na n-iomaíochtaí geostraitéisacha.

Seasamh níos ionsaithí agus iomaíocht eacnamaíoch éagórach na Síne, a cairdeas

‘gan teorainneacha’ leis an Rúis, agus an dinimic a bhaineann lena caidrimh leis an Eoraip – léiríonn siad sin athrú ón gcomhar i dtreo na hiomaíochta. Feicimid gach uile chineál beartais in úsáid mar uirlis troda, ón bhfuinneamh go dtí an imirce go dtí an aeráid. Dá thoradh sin, tá ár n-ord idirnáisiúnta riailbhunaithe ag roiseadh, agus níl ár n-institiúidí domhanda chomh héifeachtach céanna.

Beidh an réaltacht nua seo linn cibé toradh a bheidh ar thoghcháin ar fud an domhain. Ní mór **ár mbeartas eachtrach agus slándála nua** a cheapadh agus aird á tabhairt ar an réaltacht gharbh seo.

Cuirtear tús leis sin trí bheith ag obair le comhpháirtithe agus cairde atá ar aon intinn laistigh de G7 agus níos faide i gcéin. Den mheon céanna, oibreoimid go háirithe chun an **caidreamh leis an Ríocht Aontaithe a neartú** maidir le saincheisteanna leasa choitinn, amhail fuinneamh, slándáil, athléimneacht agus teagmháil idir dhaoine.

Oibreoidh mé go dlúth leis an Ard-Ionadaí/Leas-Uachtarán chun cur chuige comhordaithe a chinntiú i leith ár ngníomhaíochta seachtraí.

An méadú mar riachtanas geopholaitiúil

Nuair a chomóramar 20 bliain ó bhí an méadú is mó riamh san Aontas ann, bhí deis againn breathnú siar ar an rath a bhí air do na tíortha sin agus don Aontas ina iomláine.

Tá an stair ag glao orainn arís eile, agus tá rogha shoiléir le déanamh ag an Eoraip maidir lena todhchaí.

Creidim féin gur riachtanas morálta, polaitiúil agus geostraitéiseach é

an tAontas seo againne a chomhlánú a thuilleadh – i gcomhréir leis an ngealltanas a thugamar inár gConarthaí.

I saol na mórchumhachtaí, tugann Aontas níos mó agus níos láidre níos tuilleadh tábhacht gheopholaitiúil agus tionchar geopholaitiúil níos mó dúinn ar an ardán domhanda. Cuidíonn sé lenár spleáchais a laghdú, cuireann sé lenár n-athléimneacht agus neartaíonn sé ár n-iomaíochas. Fágann sé go bhfuilimid níos sláine agus is féidir leis an daonlathas, an chobhsaíocht agus an smacht reachta a dhaingniú ar fud na hEorpa.

Ach ní turas gan dua atá amach romhainn.

Is próiseas bunaithe ar fhiúntas a bheidh san aontachas leis an Aontas Eorpach i gcónaí – agus déanfar measúnú ar gach iarrthóir ar a dhul chun cinn féin i dtreo na critéir uile a chomhlíonadh.

Cuirfimid dlús leis an tacaíocht chun tíortha is iarrthóirí a ullmhú, go háirithe trí úsáid a bhaint as an infheistíocht agus as na hathchóirithe sa Phlean Fáis do na Balcáin Thiar agus sa tSaoráid don Úcráin. Cuideoidh an méid sin chun iad a lánpháirtiú i gcodanna de *acquis* an Aontais agus den Mhargadh Aonair agus chun go n-éireoidh siad cleachta leis an gcur chuige a bhaineann le cistí an Aontais.

Leanfar den smacht reachta agus de bhunluachanna mar bhunchlocha bheartas an Aontais um méadú – agus is iad sin bunús ár nAontais athchóirithe mhéadaithe amach anseo.

Ceapfaidh mé Coimisinéir um Méadú chun an obair sin a stiúradh.

Bhí amhras ar go leor daoine faoi chumas an Aontais líon mór Ballstát a lánpháirtiú in 2004 – agus láidreachtaí, struchtúir eacnamaíocha agus méideanna daonra éagsúla acu go léir. Ach bhí an tAontas inchurtha leis an dúshlán trí bheith ag ullmhú go hinmheánach agus ag lánpháirtiú go luath.

Beidh an Eoraip inchurtha leis an dúshlán sin arís eile.

Cur chuige níos straitéisí i leith ár gcomharsanachta

Ó tharla an cur chuige níos dírithe sin a bheith ann maidir le méadú, ba cheart cur chuige níos dírithe maidir lenár gcomharsanacht i gcoitinne, go háirithe an Mheánmhuir, a bheith ag gabháil leis freisin.

Ceapfaidh mé **Coimisinéir don Mheánmhuir** chun díriú ar infheistíocht, comhpháirtíochtaí, cobhsaíocht eacnamaíoch, cruthú post, fuinneamh, slándáil, imirce agus ar réimsí eile leasa choitinn, agus ár luachanna agus ár bprionsabail á n-urramú. Oibreoidh sé go dlúth leis an Ardionadaí/an Leas-Uachtarán.

Leis an g**Clár Oibre nua don Mheánmhuir** déanfar an caidreamh riachtanach sin a athmhúnlú agus léireofar comhartha soiléir polaitiúil comhpháirtíochta i ndomhan atá níos conspóidí agus níos éagobhsaí.

Thairis sin, **ní mór don Eoraip ról gníomhach a bheith aici sa Mheánoirthear** – ar mhaithe leis na páirtithe uile agus ar mhaithe le cobhsaíocht an réigiúin.

Ní mór dúinn leanúint de pháirt a ghlacadh sna hiarrachtaí taidhleoireachta uile chun a chinntiú **go dtiocfar ar réiteach cóir cuimsitheach maidir leis an gcoinbhleacht leanúnach in Gaza**.

Ní mór dúinn ár seacht ndícheall a dhéanamh chun stop a chur leis an mbás tragóideach. Is éard is ciall leis sin oibriú chun sos cogaidh láithreach a bhaint amach in Gaza, na gialla go léir a scaoileadh saor, agus méadú suntasach leanúnach ar shreabhadh na cabhrach daonnúla go Gaza.

Tá sos cogaidh seasmhach de dhíth orainn agus ní mór dúinn féachaint níos faide chun cinn. Ar bhonn na n-athchóirithe comhaontaithe, oibreoidimid ar phacáiste

tacaíochta ilbhliantúil le haghaidh Údarás éifeachtach na Palaistíne, lena réiteofar an bealach le haghaidh réiteach dhá stát. Is é an réiteach dhá stát an bealach is fearr chun slándáil a chinntiú do na hIosraelaigh agus do na Palaistínigh araon.

Beidh an méid sin san áireamh i **Straitéis chuimsitheach níos leithne idir an tAontas Eorpach agus an Meánoirthear** d'fhonn 'an lá tar éis an chogaidh' in Gaza a bhaint amach. Ba cheart go ndíreofaí sa straitéis sin ar an réiteach dhá stát a chur chun cinn agus ar chomhpháirtíochtaí a neartú le príomhpháirtithe leasmhara réigiúnacha.

Beartas eachtrach eacnamaíoch nua

Sa lá atá inniu ann, téann an gheopholaitíocht agus an gheo-eacnamaíocht le chéile. Ní mór do bheartas eachtrach agus eacnamaíoch na hEorpa déanamh amhlaidh.

Tá cumhacht trádála agus oscailteacht eacnamaíoch na hEorpa rithabhachtach dár rathúnas – margáí nua a oscailt dár gcuideachtaí, rogha níos leithne d'earraí inbhuanaithe a chur ar fáil do thomhaltóirí, agus infheistíocht nua a chur ar fáil inár dtionscail.

Tá an méid sin thar a bheith tábhachtach i ndomhan atá múnlaith ag an gcomhrac le haghaidh buntáiste teicneolaíoch, ina n-úsáidtear an spleáchas eacnamaíoch mar uirlis troda, agus ina bhfuil an líne idir an geilleagar agus an tslandáil ag éirí níos caoile. Ní mór dúinn na rioscaí sin a thuiscint go maith.

Tá beartas eachtrach eacnamaíoch nua de dhíth orainn le haghaidh réaltachtaí an lae inniu.

Na trí chuid lárnacha a bheidh ann ná slándáil eacnamaíoch, trádáil agus infheistíocht i gcomhpháirtíochtaí.

Ar an gcéad dul síos, tabharfaidh an Coimisiún tús áite do shlándáil eacnamaíoch agus státaireacht eacnamaíoch na hEorpa a chur chun cinn.

Is éard a chiallaíonn sé sin borradh a chur faoinár n-iomaíochas sa bhaile agus infheistíocht a dhéanamh sa chumas taighde maidir le teicneolaíochtaí straitéiseacha agus dé-úsáide atá riachtanach dár ngeilleagar agus dár slándáil.

Ag an am céanna, ní mór dúinn a bheith **níos ceannasaí maidir lenár ngeilleagar a chosaint** ar sceitheadh teicneolaíochta barrthábhachtaí agus ar ábhair inní ó thaobh slándála de. Bíonn tábhachtach ar leith leis an tsaincheist sin nuair a bhítear ag déileáil leo siúd ar iomaitheoirí straitéiseacha agus iomaitheoirí sistéamacha iad araon.

Beidh sin bunaithe ar ghrinnmheasúnú riosca agus ar ár bprionsabal maidir le '**dí-rioscú seachas díchúpláil**'.

Cuirfimid an t-athbhreithniú i gcrích ar an gcreat um infheistíocht dhíreach eachtrach a scagadh, forbróimid fíor-chur chuige comhordaithe maidir le rialuithe easpórtála, agus tabharfaimid aghaidh ar rioscaí a bhaineann le hinfeistíochtaí amach. Forbróimid caighdeáin slándála eacnamaíche do phríomhshlabhraí soláthair lenár gcomhpháirtithe G7 agus le comhpháirtithe eile atá ar aon intinn linn.

Is í an trádáil an dara colún dár mbeartas eachtrach eacnamaíoch.

Leanfaimid dár naisc saorthrádála córa a dhoimhniú le hionaid fáis agus le comhpháirtithe ar fud an domhain lena gcinnteofar cómhálartacht agus cothrom na Féinne.

Chun rochtain a chinntiú ar an méid atá de dhíth orainn chun slabhraí soláthair éagsúlaithe athléimneacha a thógáil, forbróimid raon nua Comhpháirtíochtaí Trádála agus

Infheistíochta Glaine agus déanfaimid ár gcaidrimh maidir le **mianraí criticiúla agus amhábhair** a neartú.

Chun tacú leis sin, ní mór dúinn an trádáil riailbhunaithe a chothú agus a fheabhsú, trí **Eagraíocht Dhomhanda Trádála athchóirithe neartaithe** san áireamh.

Ag an am céanna, is uailmhianaí a bheimid maidir lenár gcomhaontuithe trádála a fhorfheidhmiú agus maidir le húsáid a bhaint as ár n-**ionstraimí cosanta trádála** uile i gcás inar gá agus nuair is gá.

Is é an tríú snáithe dár mbeartas eachtrach eacnamaíoch ná comhpháirtíochtaí agus infheistíocht a dhéanamh le chéile inár leasanna agus inár gcomhpháirtithe trí Global Gateway, ár dtionscnamh chun infheistíocht a dhéanamh i dtionscadail bhonneagair ar fud an domhain.

Tabharfaimid Global Gateway go dtí an chéad leibhéal eile trí thairiscint chomhtháite a chur ar fáil dár gcomhpháirtithe – agus infheistíocht sa bhonneagar, trádáil, agus tacaíocht mhaicreacnamaíoch san áireamh sa phacáiste.

Déanfaimid sin trí chur chuige Team Europe lena dtabharfar le chéile na Ballstáit, baine forbartha poiblí agus institiúidí maoinithe forbraíochta, an Banc Eorpach Infheistíochta, an Banc Eorpach Athfhoirgníochta agus Forbartha, gníomhaireachtaí creidmheasa easpórtála, agus an earnáil phríobháideach.

Sin mar is mian linn **comhpháirtíochtaí fadtéarmacha comhthairbhreacha a chruthú** – trí infheistíocht a dhéanamh i dtodhchaí choiteann agus trí ghealltanais fadtéarmach a thabhairt.

Mar chuid de sin, is gá obair a dhéanamh freisin ar réimsí leasa choitinn leis na tíortha agus na geilleagair sa réigiún Ind-Chiúin-Aigéanach, san Afraic, i Meiriceá Laidineach agus i réigiún Mhuir Chairib.

Tá an réigiún Ind-Chiúin-Aigéanach ina réigiún cinntitheach do thodhchaí an domhain. Ag tógáil ar ár straitéis reatha, déanfaimid ár rannpháirtíocht lenár gcomhpháirtithe sa réigiún a neartú. Molfaimid **Clár Oibre Straitéiseach nua idir an tAontas Eorpach agus an India**



agus déanfaimid ár gcomhar le Comhlachas Náisiúin na hÁise Thoir Theas a neartú.

Ar an gcaoi chéanna, oibreoimid leis an tSeapáin, leis an gCóiré, leis an Nua-Shéalainn agus leis an Astráil lena bhfuil dúshláin choiteanna romhainn maidir leis an gcibirtheicneolaíocht, leis an spás agus maidir le soláthar slán mianraí criticiúla agus teicneolaíochtaí criticiúla. Ina measc sin déanfaimid iarrachtaí comhchoiteanna chun raon iomlán ár státaireachta comhcheangailte a úsáid chun an tSín a dhíspreagadh ó athrú aontaobhach a dhéanamh ar an *status quo* trí mhodhanna míleata, go háirithe maidir leis an Téaváin.

Ní mór dúinn **dlús nua a chur lenár gcomhpháirtíocht fhrithpháirteach leis an Afraic** roimh an gcéad Chruinniú Mullaigh eile idir an tAontas Eorpach agus an tAontas Afracach in 2025. Trí Global Gateway, spreagfaimid infheistíochtaí i lánáí iompair, calafoirt, giniúint fuinnimh ó fhoinsí in-athnuaite, giniúint hidrigine glaise, agus slabhraí luacha amhábh.

Oibreoimid le chéile chun aghaidh a thabhairt ar ábhair imní na hAfraice ar bhonn frithpháirteach, ó athchóiriú na n-institiúidí idirnáisiúnta go tionchar an athraithe aeráide, na déimeagrafaíochta agus na himirce ar ár mór-ranna.

Déanfaimid an comhar idir an tAontas Eorpach agus **Meiriceá Laidineach agus réigiún Mhuir Chairib** a neartú trí infheistíocht agus comhar Global Gateway maidir lenár leasanna coiteanna, ón tslándáil go fuinneamh.

An t-iltaobhachas a athmhúnlú do shaol an lae inniu

Cosnóidh an Eoraip an t-ord idirnáisiúnta riailbhunaithe i gcónaí, mar a bhfuil dlíthe agus noirm níos láidre ná neart agus coinbhleacht. Is é sin bunchloch an Aontais seo againne agus is é bunchloch ár dtodhchaí é.

Mar sin féin, ní mór dúinn aithint a thabhairt d'ábhair imní dhlísteanacha ár gcomhpháirtithe ar fud an domhain a chreideann nach iad a dhear an córas reatha ná nach n-oibríonn an córas sin dóibh.

Ba mhian liom go mbeadh **ról ceannasach ag an Eoraip maidir leis an gcóras idirnáisiúnta a athchóiriú**.

Cuirfear tús leis sin le **Cruinniú Mullaigh na Náisiún Aontaithe don Todhchaí** atá le teacht chun oibriú i dtreo ionadaíocht níos cothroime do na réigiúin uile agus chun dul i ngleic le ceisteanna a bhaineann le forbairt agus fiachas.

Ba cheart dúinn an deis seo a thapú chun ár gcóras idirnáisiúnta a chur in oiriúint do shaol an lae inniu – go háirithe maidir le ceisteanna digiteacha mar a bhfuil gá le coimircí láidre agus cineál nua rialachais.

Ní mór dúinn éisteacht le hábhair imní ár gcomhpháirtithe ar a bhfuil tionchar ag reachtaíocht na hEorpa, agus freagairt ar na hábhair imní sin ar dhóigh níos fearr, go háirithe iad siúd a bhfuil baint acu leis an gComhaontú Glas don Eoraip.

Tá cur chuige níos córasaí de dhíth orainn chun measúnú a dhéanamh ar thionchar ár ndlíthe ar thíortha nach den Aontas Eorpach iad – agus tacaíocht níos spriocdhírithe a chur ar fáil chun cabhrú leo dul i dtaithí ar na dlíthe sin agus leas a bhaint astu.

Torthaí a bhaint amach le chéile agus ár nAontas a ullmhú don todhchaí

Le cúig bliana anuas, tá an Eoraip ag tabhairt aghaidh ar chlár uaillmhianach maidir le nuachóiriú. Ní mór dúinn díriú anois ar a chur i bhfeidhm, ar infheistíocht agus ar athchóiriú chun ár dtodhchaí a ullmhú. Baineann an méid sin leis na tosaíochtaí uile a leagtar amach sna Treoirínte seo agus beidh gá le hiarracht foirme ó na hinstitiúidí agus na Ballstáit uile.

Buiséad nua atá oiriúnach dár n-uaillmhianta

Feabhsaíonn an buiséad Eorpach cáilíocht saoil agus slite beatha na saoránach, na bhfeirmeoirí, na dtaighdeoirí, na ngnólachtaí agus na réigiún ar fud na hEorpa, agus níos faide i gcéin.

Le blianta beaga anuas, léirigh an buiséad arís a thábhachtaí atá sé – ón bhfreagairt ar an bpaindéim go déileáil leis an ngéarchéim fuinnimh nó tacú leis an Úcráin.

Thángamar ar chomhaontú maidir le clár SURE chun isteach agus amach le 40 milliún post a shábháil ar fud an Aontais, maidir le NextGenerationEU chun infheistíocht a dhéanamh inár ngeilleagar amach anseo, maidir le REPowerEU chun praghsanna fuinnimh a laghdú agus borradh a chur faoinár soláthairtí tar éis dhúmhál Putin.

Agus nuair a bhí maoiniú riachtanach de dhíth orainn le haghaidh tosaíochtaí práinneacha, thángamar ar chomhaontú maidir leis an gcéad athbhreithniú meántearma riamh ar ár mbuiséad.

Léiríonn an méid sin ar fad gur féidir go leor a dhéanamh leis an mbuiséad Eorpach chun torthaí a bhaint amach sna réimsí is mó tábhacht. Ní mór dúinn a chinntiú anois go n-úsáidfimid an acmhainneacht airgeadais sin ar an mbealach is fearr is féidir sna blianta amach romhainn.

Ach tá go leor foghlamtha againn ón taithí sin freisin – go háirithe an gá le **simplíocht agus solúbthacht, luas agus fócas straitéiseach** sa chaiteachas.

Tá an caiteachas ar an leibhéal Eorpach sa tréimhse bhuiséid reatha inchurtha lenár n-iomaitheoirí – fiú gan an caiteachas náisiúnta a chur san áireamh. Mar sin féin, tá barraíocht cláir fhorluiteacha i gceist lenár gcaiteachas – a maoiníonn go leor acu na rudaí céanna ach a bhfuil riachtanais agus deacrachtaí éagsúla acu maidir le maoiniú a chomhcheangal go héifeachtach. Ní mór dúinn caiteachas an Aontais a dhíriú ar dhóigh níos fearr ar ár dtosaíochtaí coiteanna.

Tá cur chuige nua de dhíth orainn le haghaidh buiséad nua-aimseartha daingnithe don Aontas.

Chuige sin, molfaidh mé buiséad fadtéarmach nua in 2025:

a bheidh **níos dírithe** chun ailíniú lenár dtosaíochtaí agus lenár gcuspóirí, é dírithe ar na háiteanna is mó a bhfuil gá le gníomhaíocht ón Aontas, ar bhealach solúbtha. Buiséad bunaithe ar bheartas atáim a iarraidh, ní buiséad bunaithe ar chlár.

a bheidh **níos simplí** sa dóigh a n-oibríonn sé – níos lú clár ann agus plean do gach tír chun athchóirithe tábhachtacha a nascadh le hinfeistíochtaí, agus é ag díriú ar ár dtosaíochtaí comhpháirteacha a bhfuil comhtháthú eacnamaíoch, sóisialta agus críochach a chur chun cinn ina measc.

a mbeidh tionchar níos mó aige, go háirithe agus Ciste Eorpach Iomaíochais ann agus úsáid níos fearr á baint as ár mbuiséad chun maoiniú breise náisiúnta, príobháideach agus institiúideach a ghíarail.

Chun maoiniú ón Aontas a fháil, is gá an smacht reachta a urramú, agus is mar sin a bheidh sé amach anseo freisin.

Beidh orainn ár **maoiniú gníomhaíochta seachtraí a athchóiriú** freisin, chun gur mó an tionchar a bheidh aige ar ár gcomhpháirtithe, chun gur spriocdhírthe a bheidh sé dóibh, agus chun gur ailínithe a bheidh sé lenár leasanna straitéiseacha.

Chun an uaillmhian sin a bhaint amach, **tá gá le hioncam neartaithe nuachóirithe do bhuiséad an Aontais.** Beidh gá le hacmhainní dílse nua chun maoiniú leordhóthanach agus inbhuanaithe a chinntiú dár dtosaíochtaí coiteanna.

Clár oibre uaillmhianach don Eoraip maidir le hathchóiriú

Cé go raibh gá le hathchóirithe roimhe seo, tá siad riachtanach ar fad i bhfianaise an mhéadaithe.

Creidim go bhfuil **clár oibre uaillmhianach maidir le hathchóiriú** de dhíth orainn chun a chinntiú go bhfeidhmeoidh Aontas níos mó mar is ceart, chun a chinntiú go mbeimid in ann dul i ngleic le dúshlán gheopholaitiúla agus chun an dlisteanacht dhaonlathach a fheabhsú, go háirithe trí rannpháirtíocht na saoránach. Mar chuid de sin, leanfar den obair leantach ar chonclúidí na Comhdhála ar Thodhchaí na hEorpa.

Creidim go bhfuil gá le hathrú ar an gConradh i gcás inar féidir leis an méid sin an tAontas seo againne a fheabhsú.

Chomh maith leis sin, ní mór dúinn leas a bhaint as an méadú chun dul chun cinn a spreagadh maidir lenár gcumas gníomhú, ár mbeartais agus ár gcláir chaiteachais.

Ba cheart don Aontas agus do na Ballstáit a bheidh ann amach anseo a bheith réidh tráth an aontachais. Ba cheart dúinn oibriú ar an dá rud ag an am céanna. Ní mór don Aontas Eorpach éirí níos leithne de réir mar a chuirtear leis.

Sna chéad 100 lá, cuirfimid i láthair ár **n-athbhreithnithe beartais réamh-mhéadaithe** a dhíreoidh ar earnálacha aonair amhail an smacht reachta, an Margadh Aonair, slándáil bia, cosaint agus slándáil, an aeráid, fuinneamh agus imirce, chomh maith le cóineasú sóisialta, eacnamaíoch agus críochach ar bhonn níos leithne.

Cuirfimid tograí ar aghaidh chun **feabhas a chur ar chumas na hEorpa gníomhú**, agus muid ag féachaint ar fhormaidí nua agus ar phróisis chinnteoireachta nua, le haghaidh Aontas níos mó san áireamh.

Tríd an méid sin a dhéanamh, díreoidimid ar a bhféadfar a dhéanamh cheana féin agus ar na réimsí sin a bhfuil comhthoil choiteann ag teacht chun cinn ina leith.

Torthaí a bhaint amach i gcomhar le Parlaimint na hEorpa

In 2019 thug mé tús áite don chomhpháirtíocht idir an Coimisiún Eorpach agus Parlaimint na hEorpa a neartú.

Gheall mé ról níos láidre a thabhairt don Pharlaimint maidir le reachtaíocht a thionscnamh agus a mhúnlú. Chomhlíonamar an méid sin trí fhreagairt ar rúin na Parlaiminte ar Airteagal 225 le tograí reachtacha agus lánurraim á tabhairt do phrionsabail na comhréireachta, na coimhdeachta agus na reachtóireachta níos fearr.

Tacaím i gcónaí leis an gceart tionscnaimh sin.

Neartóimid ár gcomhar maidir le hAirteagal 225 trí iarraidh ar na Coimisinéirí páirt a ghlacadh in idirphlé struchtúrtha le coistí Parlaiminteacha i leith na rún sin.

Ag an am céanna, tá go leor réimsí ann inar féidir linn feabhas a chur ar an gcaoi a n-oibríonn ár n-institiúidí le chéile.

Sin an fáth ar mian liom oibriú le Parlaimint na hEorpa chun **athbhreithniú tapa a dhéanamh ar ár gCreat-Chomhaontú**. Cuideoidh an méid sin linn ár bhfreagracht pholaitiúil chomhpháirteach a neartú, ár n-idirphlé a neartú agus an sreabhadh eolais a mhéadú, agus trédhearcacht níos fearr a chinntiú.

Bhí gá le freagairt eisceachtúil ar go leor de na géarchéimeanna a bhí romhainn le linn an tsainordaithe dheireanaigh, go háirithe trí úsáid a bhaint as Airteagal 122 CFAE.

Tá dearcadh na Parlaiminte i leith an ábhair sin cloiste agam, agus cinnteoidh mé nach n-úsáidfear an uirlis sin ach amháin i gcásanna eisceachtúla. Nuair a bhainfear úsáid aisti, cinnteoidh mé **go dtabharfaidh an Coimisiún údar iomlán le húsáid Airteagal 122** don Pharlaimint.

Ar deireadh, ba mhian liom **ár n-idirphlé a neartú** agus a chinntiú go mbeidh Coimisinéirí i láthair níos mó ina gcoistí faoi seach.

Beidh an Coláiste ar fáil chun freagairt ar aon éileamh ó Pharlaimint na hEorpa ar dhíos póireacht sa suí iomlánach san fhormáid is iomchuí.

[REDACTED]

[REDACTED]

[REDACTED]

[REDACTED]

[REDACTED]

[REDACTED]

[REDACTED]

[REDACTED]

[REDACTED]

[REDACTED]

[REDACTED]

[REDACTED]

